

**Rollup Banner**  
**Hot Price!**  
 Best price in PNG!!

**OFFER EXTENDED**  
 until 31st AUGUST

**K440** inc. GST  
 SINGLE SIDED

**K825** inc. GST  
 DOUBLE SIDED

- PREMIUM STYLE 85cm WIDE BASE
- FULL COLOUR SEMI-GLOSS PRINT
- DESIGN SERVICE AVAILABLE

Only at...  
**THEODIST** LTD  
 THE STATIONERY SUPERMARKET

Waigani Drive, POM  
 Ph: 313 9800  
 sales@theodist.com.pg

Markham Road, LAE  
 Ph: 472 5488  
 saleslae@theodist.com.pg

**Fiji brukim lo bilong tred - P6**



# Papagraun bai gat sea long Ok Tedi na BCL



**Lainim sefti bilong solwara**

Ol sumatin bilong Pasifik Marintime long Pot Mosbi i kisim skul long wei bilong sevim laip long laip raf na tu wei bilong lukautim laip raf. Ol i bin kisim skul long Ela nambis long Mosbi long dispela wik. *Poto: Nicky Bernard.*

PRAIM Minista Peter O'Neill i tok gavman bai givim bek sampela sea i go long ol papagraun bilong Ok Tedi kopa main na Bougainville Copper Limited (BCL).

Mista O'Neill i tok gavman bai givim wan-ted (1/3) o klostu long 30.3 pesen sea-holding bilong Ok Tedi main i go bek long ol papagraun bilong Ok Tedi na manmeri long Westen Provins taim gavman bai holim tu-ted (2/3) o 60.7 pesen seaholding.

Gavman i tekova pinis long Ok Tedi main long yia 2012 na em i 100 pesen seaholda bilong dispela bikpela wol klas kopa main i stap long Not Fly distrik long Westen Provins.

PNG Sustainable Development Program Limited (PNGSDP) i bin gat 52 pesen na PNG Gavman i bin gat 20 pesen sea long Ok Tedi main tasol nau gavman i gat 100 pesen onasip o sea long Ok Tedi main.

Mista O'Neill i tokim Palamen olsem ol papagraun na

manmeri bilong Westen Provins bai gat fri-keri ekwiti.

Dispela i soim olsem ol papagraun na manmeri bilong Westen bai no inap baim sea long Ok Tedi tasol ol bai kamap seaholda nating aninit long wanpela agrimen.

*Wantok Niuspepa* i bin laik long kisim toktok bilong Westen Gavana Ati Wobiro na Mmeba bilong Not Fly, Boka Kondra tasol Mista Wobiro i stap wet kot na Lidasip Traibunel kot i saspensim Mista Kondra.

Panguna tu em i bikpela wol klas kopa main tasol i bin pas i stap long Bogenvil ailan. Operesen bilong main i no kamap bihain long bikpela pait long Bogenvil i bin pasim wok.

Mista O'Neill i tok gavman i luksave long hevi ol manmeri na papagraun bilong Panguna kopa main i bin bungim long taim bilong Bogenvil Krais.

**I go moa long pes 2...**

## CHECK-IN FAST! CHECK-IN ONLINE!

Book a Flight    Manage Booking    Check In

Return    One Way    Multi-City

From ...    30/05/2016    Adults 1    Children 0    Infants 0    Economy    Sort By Flexible Date    Price    Schedule





# Gavman luksave long liklik balus kampani



Gavman i luksave long ealain sevis MAF i save givim long rurel komyuniti long PNG. Piksa i kam long MAF Singapore websait.

OL liklik balus kampani i save givim sevis long ol manmeri i stap long ol rurel eria we i no gat rot na gavman i luksave long dispela bikpela helpim ol i save givim long ol pipel, Minista bilong Sivil Aviesen Davis Steven i tok.

Minista Steven i tokim Palamen long Trinde las wik olsem kain ol liklik balus kampani olsem Mission Aviation Fellowship (MAF), New Tribe Mission, Good Samaritan Aviation, SDA Aviation na arapela ol ted level ealain opereta insait long kantri i save givim gutpela sevis long pipel.

Mista Steven i tok em i amamas long wok bilong ol na em i luksave long ol nid bilong ol bihain long gavman i kirapim Rurel Aviesen Ejensi (RAA).

“RAA i luksave long nid bilong ol liklik balus kampani. Mi bing bungim ol menesmen biolong planti ol ted level aviesen opereta na ol i tokim mi long wanem kain ol nid ol i gat long sevim gut moa long 80 pesen populesen bilong kantri husat i save stap long ol rurel eria,” Mista Steven i tok.

Long helpim ol liklik balus kampani, Mista Steven i tok gavman bai lukluk long rausim sampela mani ol i save sasim olsem lending fi long ol ted level ealain opereta, stopim diuti na takis mani ol i save sasim long ol enjin na pat bilong liklik balus, na skruim CADIP program i go long ol rurel ples balus.

“CADIP (Sivil Aviesen Developmen

Invesmen Program) ppgrem i lukim sampela bikpela ples balus insait long kantri i kisim helpim na stretim gen ol samting bilong ples balus,” Mista Steven i tok.

Mista Steven i tok long helpim ol liklik balus kampani, Gavman i kamapim RAA na dispela ejensi i wok lng lukim ol nid bilong ol, wok-bung wantaim ol long stretim ol samting, na helpim ol long givim moa sevis long ol pipel long kisim sevis.

“Long ranim balus kampani em i bikpela mani tru, tasol ol dispela liklik balus kampani bilong ol misin na sios i go pas long givim sevis long ol pipel bilong yumi.

“Moa long 80 pesen bilong populesen bilong manmeri bilong dispela kantri i stap long ol ples long rurel eria.

“Long ol i kam baim samting, kam long haus sik, baim ol marasin saplai, na salim ol pikinini bilong ol i kam lng skul, ol i save yusim ea sevis we ol liklik balus kampani i givim.

“Ol Gavman bipo i no bin luksave long dispela gutpela wok ol i mekim. Tasol dispela Gavman i luksave long wok bilong ol na mipela i amamas long sevis ol i givim long pipel bilong yumi,” Mista Steven i tok.

RAA i wok wantaim ol ted level ea lain kampani long stretim wari bilong ol na helpim ol long ranim gut ol operesen bilong ol, Mista Steven i tok.

# DPM bin ranim gut planti bikpela bung

DIPATMEN ov Praim Minista na Nesanel Eksektiv Kaunsil (DPM & NEC) i bin ranim gut planti bikpela intanesenel bung long Pot Mosbi long las yia, Praim Minista Peter O’Neill i tok.



Praim Minista Peter O’Neill

Praim Minista O’Neill i mekim dispela toktok long las wik Trinde taim em i givim anual ripot bilong olsem wanem em i yusim mani long Dipatmen bilong em long las yia.

Taim planti ol arapela gavman dipatmen na stet ejensi i no givim yet anual ripot bilong ol, Dipatman ov Praim Minista na Nesanel Eksektiv Kaunsil i kamap namba wan dipatmen long givim dispela ripot long Palamen.

Mista O’Neill i tok dispela ripot em i tok long olsem wanem dipatmen bilong em i bin yusim mani long las yia. Mista O’Neill i ama-

Em i tok planti bikpela samting i bin kamap long kantri long las yia na dipatmen bilong em i bin go pas long helpim sampela ol gavman ejensi long holim sampela ol bikpela intanesenel bung.

Mista O’Neill i tok nem bilong PNG i nau pairap long planti kantri bikos PNG i bin holim planti bikpela bung na ol lida bilong wol i nau luksave long kantri bilong yumi.

“Mipela i bin holim 2015 Pasifik Gems long Pot Mosbi na dispela bikpela gems i bin kamap wanpela gutpela memori long laip bilong ol manmeri PNG na ol poroman bilong yumi long Pasifik.

“Bihain long Pasifik

Gems, PNG i bin holim namba 46 Pasifik Ailans Foram Lidas Samit long Pot Mosbi.

“Dispela bung i bin kamap gut tru stret na planti ol lida bilong Pasifik i bin wanbel long gutpela pasin PNG i bin soim long dispela bung,” Mista O’Neill i tok.

Em i tok dipatmen bilong em i bin stretim raun bilong sampela ol senia gavman opisal i go long long Ingran, Frans, India, Japan, Pilipins, Australia na Nu Silan, Solomon Ailan na Saina.

Moa long en, em i tok diptamen i bin holim 31 bung bilong Nesanel Eksektiv Kaunsil (NEC), kamapim 570 NEC sabmisen, na kirapim 79 nupela lo bilong kantri.

“Ol pastaim gavman i no bin mekim dispela kain bikpela wok,” Mista O’Neill i tok.

# Papagraun bai gat sea long Ok Tedi na BCL

I kam long pes 1...

“Mipela i luksave long hevi ol manmeri bilong Bogenvil na papagraun long Panguna i bin kisim. Gavman bai givim ol 17.4 pesen sea bilong BCL,” Mista O’Neill i tok.

Mista O’Neill i tok PNG bai gat nupela maining lo we Palamen bai lukluk long en long dispela sindaun.

Em i tok dispela nupela lo bai givim sans long ol papagraun na mameri long kantri long gat moa sea na bai helpim pipel long kisim moa benefit.

PNG Chamber ov Mines na Petroleum i toktok strong egensim



Bogenvil mep

dispela nupela lo bilong maining bikos ol i save makim maus bilong maining na petroleum

kampani, ol i no save makim maus bilong pipel na gavman bilong PNG.

**Meadow Fresh**

**JINGLE COMPETITION**

**Win K20,000**

worth of Music & Sporting equipment for your school

Get together with your school mates and write a 30 second Meadow Fresh jingle.

Full competition details available in a store near you.

goodman fielder

100% NEW ZEALAND MILK

100% NEW ZEALAND MILK

100% NEW ZEALAND MILK





Deputi Oposisen Lida Sam Basil

# Polye: Larim NSO kam aninit long DPM

**OPOSISEN** Lida Don Polye i laikim Palamen long mekim wanpela lo long larim Dipatmen ov Praim Mnista (DPM) na Nesanel Eksektiv Kaunsil (NEC) i lukautim Nesanel Statitikel Opis (NSO).

Mista Polye i laikim Palamen long senisim lo bilong kamapim dispela bikos statistiks em wanpela namba wan samting we gavman i nidim long mekim plen bilong kantri.

Mista Polye i tok NSO em i wanpela namba wan gavman ejensi tasol taim em i stap aninit long Dipatmen ov Nesanel Plening na Monitaring, em i no mekim wok gut na em i no stap gut.

“Mi laikim NSO i mas kam aninit long DPM na NEC. Praim Minista em i bos bilong dispela kantri na em i mas save long hamas namba bilong manmeri i stap long kantri.

“Em i mas save long hamas nupela bebi i bon long Pangia o Kandep distrik. Dispela em i namba wan samting we Praim Min-



Oposisen Lida Don Polye

ista, husat i Sif Eksektiv Opisa (CEO) bilong dispela kantri i mas save,” Mista

Polye i tok.

Mista Polye i tok gavman i mas lukluk long kirapim

NSO bikos dispela gavman ejensi i no mekim gut wok bilong em maski gavman i wok long givim mani long em long mekim wok.

“Yumi no save long trupela populesen bilong dispela kantri. Sampela taim yumi save tok em i 7 milien, na sampela taim yumi sve tok em i 8 milien.

“Sapos NSO i mekim wok bilong em, bai yumi save gut long tru tru populesen bilong kantri bilong yumi. Bai yumi save gut long hamas manmeri i dai long wanpela yia, na hamas nupela bebi i bon long dispela yia.

“Tasol nau yumi no gat dispela infomesen bikos NSO i no mekim wok bilong em gut. Long dispela as tasol, mi laikim yumi mas mekim nupela lo long larim NSO i kam insait na stap aninit long DPM na NEC.

“Praim Minista bai lukluk long dispela gavman ejensi na helpim em long mekim wok. Wokim bilong NSO em i namba wan,” Mista Polye i tok.

## Daunim lending fi bilong ples balus

DEPUTI Oposisen Lida Sam Basil i askim sapos Gavman i ken daunim lending fi bilong ol liklik balus kampani husat i save sevim ol manmeri long rurel komyuniti.

Lending fi em i mani ol balus kampani i save peim long National Airports Corporation (NAC) na NAC i save givim i go long gavman olsem win mani.

Mista Basil i tok ol liklik balus kampani o ted level ealain opereta insait long PNG i wok long givim gutpela sevis long ol pipel bilong em long Bulolo na em i laikim gavman long luksave long dispela gutpela helpim ol i givim long ol pipel husat i stap long ples.

Mista Basil i tok insait long distrik bilong em long Bulolo, planti manmeri i save kisim sevis ol liklik balus kampani bikos i no

gat gutpela rot we ol manmeri i ken yusim long i go kam long taun long mekim soping, haus sik o skul.

“Insait long ilektoret bilong mi, mipela i gat 6-pela liklik ples balus. Na mi laik tok tenkyu long ol liklik balus kampani husat i save givim sevis long ol pipel long Bulolo,” Mista Basil i tok.

Mista Basil i tok ol balus kampani long Bulolo i save helpim ol manmeri long Sohe distrik long Oro Provins na Galp Provins.

“Yumi ken mekim lo insait long Palamen long daunim prais bilong Jet A1 fiul bilong balus. Gavman i ken lukluk long daunim takis mani em i save kisim long ol pats bilong piston injin bilong balus,” Mista Basil i tok.

## Juffa laikim eksen, i no toktok

GAVANA bilong Oro, Gary Juffa, i les long ol memba na lida i toktok planti sapos ol i laik stretim hevi bilong Klaimet Senis.

Gavana Juffa i laikim ol lida bilong kamapim eksen stret na em i tok ol lida i mas soim rot long mekim eksen bilong stopim hevi bilong Klaimet Senis i kamapim birua long ol nambis na ailan bilong PNG.

Mista Juffa i mekim dispela toktok long Tunde long dispela wik long Palamen taim em i dibeit long polisi bilong Klaimet Senis.

“Yumi i toktok long lukau-

tim bus, graun na wara. Tasol long narapela sait, yumi wok long larim ol foren kampani i kam insait long bus bilong yumi na katim olgeta diwai.

“Ol loging kampani i no planim gen sampela nupela diwai long larim ol pikinini bilong yumi i yusim long bihain taim.

“Ol i kam insait long kantri bilong yumi na kisim SABL (Spesel Egrikalsa Bisnis Lis), katim daun olgeta diwai, bagarapim bus, graun na wara.

“Ol i no mekim wanpela gutpela samting. Nau yumi toktok long Klaimet Senis,

tasol yumi no fit long lukautim bus, graun na wara bilong yumi yet.

“Yumi larim ol maining kampani i kam insait na rausim pipia na rabis wantaim ol kemikel nogut i go daun long wara na kilim dai pis na ol samting,” Mista Juffa i tok.

Em i tok olgeta manmeri PNG i save olsem bus, graun na wara em i bikpela samting long laip bilong man, tasol Palamen i mekim lo long larim ol loging kampani i katim daun ol diwai na bagarapim olgeta samting insait long bus.

Mista Juffa i mekim dispela toktok taim Minista bilong Envairomen na Konsevesen, John Pundari, i bin tokim Palamen long wanem samting dipatmen bilong em i wok long mekim long birua bilong Klaimet Senis na Global Woming.

Long PNG, dispela birua bilong Klaimet Senis na Global Woming i wok long bringim hevi long sampela hap bilong PNG olsem Kataret Ailan long Bogenvil, we level bilong solwara i go antap na laik daunim liklik ailan.

## SMART SOLUTIONS FOR SMALL BUSINESS

“With the **BSP Smart Business Package**, I offer the right mix of payment options for my customers; **EFTPoS, Mobile and Internet Banking** and I use a **Smart Business Debit Card** for my supplier payments.

Plus, the Smart Business current account provided transaction records that were used to support my **BSP Smart Business Loan** application to help me expand my Business.”

**Helen Victor**  
Owner of Zoenani Gas Ltd  
BSP Smart Business customer



WE ARE **BSP**

# Sefti em i namba wan samting long Bogenvil



Oi liklik bot na bikpela sip wantaim i luksave long sefti taim ol i lonsim SCRB na GMDSS.

OL namba wan samting we National Maritime Safety Authority (NMSA) i kamapim long las 12 mun i helpim long kirapim maritaim sefti bilong Bogenvil.

Tupela Gavman bilong PNG na Australia i givim mani long kirapim Smil Kraft Rejistresen Bod (SCRB) na kamapim Global Maritaim Distres na Sefti Sistem (GMDSS), we i karamapim olgeta solwara bilong PNG.

Tupela gavman wantaim i luksave long namba

wan wok solwara bilong Bogenvil i save mekim long promotim ikonimik developmen na konektim ol ruel komyuniti long kisim sevis.

NMSA i bin wok wantaim ol manmeri bilong Bogenvil long kirapim gutpela sefti bilong solwara wantaim ol sefti ikwipmen na kamapim rjistri bilong ol liklik bot.

Smol Kraft Rejistresen Bod bilong Bogenvil bai lukluk na inspektim olgeta liklik bot insait long Atonomus Rijon bilong Bogenvil.

Lonsing bilong GMDSS i bin kamap long Mei 2016 na dispela i save kamapimgutpela komyunikesen sistem bilong maritaim sefti.

CEO bilong NMSA, Paul Unas, i tok dispela projek i bringim planti gutpela samting i kam long Bogenvil.

“Dispela nupela komyunikesen sistem em namba wan samting long sefti bilong ol sip na bot insait long solwara bilong Bogenvil. Dispela projek em i gutpela long kirapim maritaim sefti bilong ol manmeri bilong yumi long dispela rijon,” Mista Unas i tok.

NMSA i bin wok hat long givim ol save na skul samting bilong sefti long ol manmeri long hap na long ol oka komyuniti husat i save yusim ol sip na bot olsem transport sistem bilong ol long olgeta de.

NMSA i bin givim ol trening na i bin soim ol piksa, ol pepa demonstresen, na arapela ol samting long givim save long ol asples long hap.

Ol lida bilong ples long Nisan ailan i bin amamas long dispela autris bilong NMSA na dispela ol skul samting we ol i bin givim long ol asples i bin helpim ol long luksave long ol sefti samting na sevim laip bilong ol sapos ol i bbugim birua ong solwara.

Moa long 200 manmeri i bin lainim ol samting bilong inspeksen, registresen, laisensing, na arapela ol samting bilong maritaim sefti.

Sapot bilong Gavman bilong Australia long dispela ol projek i kam aninit long Papua New Guinea-Australia Transport Sector Support Program (TSSP).

# Bisnisan les long pasin bilong stilim graun

WANPELA bisnisan bilong Enga Provins i salensim ol wok manmeri bilong Lens Dipatmen na Nesenel Kapital Distrik Komisn (NCDC) Fisikel Plening Bod long bihainim lo na mekim wok stret.

Bisnisan Saka Ben Wia i tok NCDC PPB na Lens Dipatmen i gat planti gutpela wok manmeri tasol wan wan opisa i wok long kisim braiberi mani na mekim ol man i pait na kamapim birua.

Mista Wia i no amamas long dispela kain pasin bikos ol lain long dispela

tupela ogenesesen i givim tok orait long em i ken kirapim wanpela graun bilong gavman i stap nating, na bihain, ol i tokim narapela man long banisim dispela graun.

Mista Wia i tok dispela pasin bilong tokim tupela man long developim wanpela graun i soim olsem sampela samting i no stret long dispela tupela gavman opis.

Em i mekim dispela toktok bihain long wanpela bikpela pait i kamapamel long ol wokman bilong em na ol

wokman bilong narapela man Enga.

Mista Wia i tok em i bin askim NCD Fisikel Plening Bod long developim wanpela graun i stap nating long het bilong Jackson’s ples balus na long sait bilong Wild Life.

“Nem bilong dispela graun bilong gavman i stap nating em i Pat Posen 172. Em i 9.127 hekta stet len i stap nating. Mi laik developim na aplai long kisim len taitel.

“Mi kisim tok orait long NCD na taim mi laik putim banis rounim dispela graun, narapela man Enga i

kam wantaim polis, rausim ol banis ol wokman bilong mi i sanapim. Na em i tokim ol manmeri husat i stap arere long Erima na 8-Mail Setelmen long brukim glas bilong 3-pela Toyota len krusa kar na wanpela bekho masin bilong mi,” Mista Wia i tok.

Em i tok mani mak bilong dispela bagarap em i klostu long K100, 000. Em i tok em i putim komple pinis long polis na em i tok save pinis long loya bilong em long kotim dispela man Enga.

# Kapurangi bai stap ekting ESP edministreta

PABLIK Sevis Minista Sir Puka Temu i tok ekting edministreta bilong Is Sepik Provins, Elizabeth Kapurangi, bai kamap ekting provinsal edministreta i go inap tripela mun moa.

Sir Puka i tok taim Dipatmen ov Pesenel Menesmen (DPM) i wok long askim Is Sepik Provinsal Ekseketiv Kaunsil (PEC) long givim nem bilong husat man o meri ol i laik makim em i kamap provinsal edministreta, ol i wok long tokim DPM long putim nupela niuspepa edvataismen gen na painim nupela man.

Sir Puka i tok dispela i

mekim DPM i hat long painim nupela man o meri husat bai kamap pemenen edministreta bilong Is Sepik.

“Mipela i kisim edvais long Is Sepik Provinsal Gavman na long opis bilong Gavana bilong Is Sepik (Gren Sif Sir Michael Somare). Ol i laikim Mis Kapurangi long kamap ekting provinsal edministreta.

“DPM bai larim Mis Kapurangi i kamap ekting edministreta i go inap tripela mun,” Sir Puka i tok.

Sir Puka i mekim dispela toktok long Palamen long Tunde dispela wik taim

Memba bilong Angoram, Salio Waipo i askim olsem wanem na Is Sepik i no gat wanpela pemenen edministreta bilong lukautim pablik sevis long provins.

“Mipela i no gat wanpela pemenen provinsal edministreta na em i 4-pela yia nau. Dispela i mekim hat long mipela i wokbung wantaim na givim sevis long ol pipel bilong yumi long provins,” Mista Waipo i tok.

Sir Puka i tok las disisen long makim provinsal edministreta bai kam long Provinsal Ekseketiv Kaunsil (PEC) na DPM bihainim laik bilong PEC na makim dispela man or meri.

# O’Neill bai askim BPNG long lukluk long K20 pepa mani

PRAIM Minista Peter O’Neill bai askim Benk ov PNG (Sentral Benk) long skruim taim na larim ol manmeri husat i stap long ples i givim bek ol olpela K20 pepa mani.

Mista O’Neill i tok planti ol lapun manmeri i stap long ples i no save olsem Sentral Benk i stopim yumi long yusim dispela olpela K20 pepa mani na sampela manmeri long ples i yusim i stap yet.

“Mi bai askim Sentral Benk long givim sans long ol lapun meri bilong yumi long ples na larim ol i givim ol olpela K20 pepa mani i go bek gen long Sentral Benk,” Mista O’Neill i tok.




Mista O’Neill i mekim dispela toktok taim Memba bilong Bulolo, Sam Basil, i tokaut olsem sampela ol lapun manmeri long ples bi-

long em i yusim yet ol olpela K20 pepa mani.

Mista Basil i tok planti ol manmeri long ples i no save ritim notis long niuspepa bikos ol i no bin go skul na i no rit na rait.

Mista Basil i tok planti ol ples manmeri long distrik bilong em i save mekim hatwok, salimgol na kaikai na kisim mani.

“Ol i yusim yet K20 pepa mani na mi laik askim sapos Praim Minista i ken toktok wantaim Sentral Benk na larim ol i senisim pepa mani na kisim plastik mani,” Mista Basil i tok.



**Wantok niuspepa i laikim ol eijen insait long Madang, Kimbe, Kundiawa, Wewak, Jiwaka, Tari, Kiunga, Tabubil, Daru, Kerema, Manus, Kavieng na Alotau long salim niuspepa bilong mipela.**

**Mipela i laikim ol Eijen long distributim niuspepa long dispela ol ples antap hariap tru!**

Sapos yu ting yu em rait man o meri long dispela wok, ringim Sekulesen Supavaisor bilong mipela long Fon: **325 2500 o Mobail namba: 7384 6688 o email i kam long: seovo@wantokniuspepa.com**





# PIH Saveman *Nius*

“I kam long Pacific International Hospital Port Moresby”

Ph: 311 3000 and 799 88000 Website: www.pihpng.com

# Kidney Stones

Do you feel frequent sharp pain in your back and lower abdomen, painful urination or see blood in urine? Then it's time to visit a doctor, you may have kidney stones.

### What are kidney stones?

Kidney stones are solid stone-like crystals of various sizes that can develop in one or both of the kidneys. They can vary in size from as small as a grain of sand to as big as golf ball.

### How are kidney stones formed?

The kidneys filter the blood and remove the extra waste and water as urine. Crystals are formed when your urine contains high concentration of substances such as calcium, oxalate, cystine or uric acid. When these crystals collect inside the kidneys over time, they can develop into a hard stone-like lump forming kidney stone.

### What are the types of kidney stones? Why is it essential to know?

Knowing the type of kidney stones helps to understand the cause and this may reduce your risk of developing more kidney stones in the future.

### Based on the chemical composition, kidney stones can be classified into four types:

**Calcium stones** – These are the most common types of kidney stones and occur when the



urine has high concentration of calcium or oxalate.(usually in form of calcium oxalate)Oxalate is naturally found in food. Some fruits, vegetables and foods like nuts and chocolate have high oxalate levels. Liver also produces oxalate. High doses of vitamin D and several metabolic disorders can increase the concentration of calcium or oxalate in urine. Calcium stones may also occur in the form of calcium phosphate.

**Uric acid stones** - These are formed when your urine contains too much acid. People who eat lot of high-protein diet like meat, fish, shell fish, those who don't drink enough water or lose more fluid may get uric acid stones.

**Struvite stones** - The causes of struvite stones include ex-

tremely alkaline urine (often from inappropriate diet), a urinary tract infection, high steroid use and abnormal holding of urine or any disorder of the urinary tract, this is common in females.

**Cystine stones** - These result from a genetic disorder, a problem passed from parent to child. The kidneys excrete too much of certain amino acids.

### SYMPTOMS

Kidney stones usually may go unnoticed if small and may even pass through urine. But, when the stone moves around within your kidney or passes into your ureter (the tube that connects kidney and bladder) or if the stone is bigger in size you may experience the following signs and symptoms:

- Severe pain in the side and back, below the ribs
- Intense pain in the groin also called as Renal Colic
- Blood in the urine
- Pain while urinating
- Vomiting
- Nausea
- Discoloured or foul-smelling urine
- Chills
- Fever

### Risk Factors

- Kidney stones are more likely to happen between 20 years to 40 years of age.
- Family history of kidney stones
- Past history of stones
- Drinking less water
- Obesity
- Having diet high in protein, salt or glucose
- Other medical conditions (hyperparathyroidism, renal tubular acidosis, gout, intestinal bypass surgery, etc)

### Treatments for Kidney Stones

Treatment for kidney stones varies, depending on the type of stone and the cause. Sometimes drinking plenty of water and medicinal therapy is enough to get rid of small stones. In cases of large stones, surgery or other assistance may be required.

### Preventing Kidney Stones

**Preventing kidney stones** is easy; following some preventive measures can help in preventing the stones.

### Eating, Diet and Nutrition

Preventing kidney stones may be as simple as changing your diet! Fluids – Water reduces risk, but soda increases it Drinking enough fluids each day is the best way to help prevent most types of kidney stones. You should drink 2 to 3 litres of fluid a day. People with cystine stones, may need to

drink even more. Though water is best, other fluids may also help prevent kidney stones, such as citrus drinks. Avoiding diet rich in sugar, sodium, animal protein, calcium and oxalate.

Pay attention to signs and symptoms of kidney stones. Keep a check on your diet and prevent the stones coming in the path of your healthy life.

PIH is Port Moresby's largest private hospital offering more than 14 specialities under one roof, with specialists and technologically advanced equipment being utilized to bring modern healthcare to PNG. PIH is the only hospital in Papua New Guinea to conduct the modern PCNL – 'cut less' laser kidney stone removal. Call us at 71 55 88 66 to confirm an appointment with overseas urology specialist.

If you have any further queries about kidney care or urology, please feel free to email us at info@pihpng.com or simply walk in and ask to be shown around the new facility.

**Disclaimer:** The information available on this feature related to images, graphics, text and other content is available for educational purposes only. Seek the advice of your doctor in respect to questions on a medical condition or treatment and do not disregard the doctor's professional advice after reading information in this feature.



## Another Milestone for PIH Cut-Less Laser Lithotripsy

Kidney stones making life difficult for you? Advanced technology of keyhole surgery & lasers to treat kidney stones larger than 2cm in diameter is now available, right here in Port Moresby.

Call us today on 7091 8115 to book your free consultation.



Pacific International Hospital:  
Taurama, 3 Mile, Port Moresby,  
PNG - info@pihpng.com  
www.pihpng.com | @pihpng | @pihpng

FREE  
Consultation

# Fiji brukim lo bilong tred

Fiji i brukim lo bilong tred aninit long World Trade Organisation (WTO) na sampela protokol bilong Melanesian Spearhead Group (MSG) tred agrimen taim em i les long kisim namba wan buli bif bren bilong PNG, Ox & Palm.



Richard Maru

Minista bilong Tred, Komes na Industri, Richard Maru, i tok PNG i laik salim Trukai Rais, Ox & Palm na sampela samting i go long maket bilong Fiji tasol Fiji i les long givim sans.

Maski tupela kantri wantaim i memba bilong WTO, MSG na Pasifik Ailan Forum (PIF), Fiji i gridi long larim PNG i salim ol prodak bilong em long kantri bilong ol.

Mista Maru i tokim Palamen long dispela wik Tunde olsem PNG i bin salim i go long Fiji K16.6 milien mak bi-

pela ol liklik Pasifik Ailan kantri tasol Fiji i no rispekim PNG.

“Dispela pasin i no stret. Tupela kantri wantaim i memba bilong WTO, PIF na MSG. Fiji i no bihainim sampela ol protokol na agrimen i stap long dispela ol rijonal na intenesenel ogenesesen,” Mista Maru i tok.

Mista Maru i tok dispela namba wan mit bilong PNG i no gat wanpela nogut samting long bagarapim helt bilong ol manmeri tasol Fiji i no mekim wanpela gutpela tok tok long olsem wanem ol i stopim Ox & Palm long go insait long maket bilong ol.

“NAQIA (National Agriculture na Quarantine Inspection Authority) i bin sekim pinis ol baio-sekyuriti samting bilong Ox & Palm tasol i no gat

wanpela birua i stap. NAQIA i sekim pinis na i tokim mi olsem helt na sefti standet bilong Ox & Palm em i stap gut,” Mista Maru i tok.

Em i tok PNG i larim Fiji wara, plaua, na arapela prodak bilong Fiji long kam insait long PNG maket tasol sapos gavman bilong Fiji i les long larim Ox & Palm i go insait long Fiji maket, PNG bai stopim ol prodak bilong Fiji long kam insait.

“Sampela ol bikipela manmeri long Fiji i laikim tru Trukai Rais na Ox & Palm bilong PNG. Ol i no wanbel long gavman bilong Fiji i stopim dispela tupela biknem prodak bilong PNG i go insait long Fiji maket,” Mista Maru i tok.

Mista Maru i givim tupela wik long Fiji long stretim dispela hevi.

# NHC mas givim taitel hariap

NATIONAL Housing Corporation (NHC) i no givim yet taitel bilong Opisal Residens o haus bilong Gavana bilong Madang Provins.

Memba bilong Usinobundi, Anthon Yagama, i askim Praim Minista Peter O’Neill long dispela wik Trinde long Palamen sapos em i ken tokim ol lain long NHC long givim taitel bilong dispela haus i go long Madang Provinsal gavman.

Mista Yagama i tok NHC i bin bosim dispela haus pastaim tasol ol i

salim i go long Madang Provinsal Gavman, husat i baim dispela haus long K1.9 milien.

“Provinsal gavman i baim dispela haus pinis. Mipela i givim K1.9 milien pinis tasol ol i no givim taitel long mipela yet,” Mista Yagama i tok.

Praim Minista O’Neill i tok em bai askim NHC long givim taitel bilong dispela propeti go long Madang Provinsal Gavman.

“Planti samting i no stret long NHC. Ol manmeri husat i wok long dispela kampani bilong

gavman i ting ol inap long mekim ol samting long laik bilong ol yet.

“Mi ting mipela bai daunim ol pasin no gut long NHC, tasol nau samting i bagarap olgeta, na mipela bai lukluk long en,” Mista O’Neill i tok.

Em i tok NHC i mas stopim dispela sik bilong salim haus nating long laik bilong ol yet, na strongim sait long holim taitel.

“Bai mi askim Minista bilong Hausing long lukluk long dispela samting,” Mista O’Neill i tok.

# Mai: PNG Power mas kam long Vanimo

GAVANA bilong Wes Sepik Provins, Amkat Mai, i laikim Minista bilong Pablik Entaprais na Stet Invesmen, William Duma, long kisim PNG Power i go long Vanimo na putim ol pawa lain long larim ol manmeri i kisim pawa saplai.

Mista Mai i tok pastaim Minista bilong Pablik Entaprais, Ben Micah, i bin sainim wanpela agrimen wantaim wanpela pawa saplai kampani bilong Indonesia long pulim pawa saplai long Jayapura na kam insait long Vanimo na Wes Sepik.

Em i askim Minista Duma sapos em i ken kisim PNG Power i go long Vanimo na statim ol



Gavana bilong Sandaun Amkat Mai

wok long planim pawa pos long Vanimo i go long Bewani na i go long Wutung boda.

“Mi laikim Memba bilong Vanimo-Green (Belden Namah) tu long sapotim dispela wok wantaim sampela DSIP mani na larim ol pipel bi-

long yumi i kisim pawa saplai i kam long Indonesia,” Mista Mai i tok.

Mista Duma i tok em bai sekim dispela agrimen we Mista Micah i bin sainim pastaim wantaim dispela pawa kampani bilong Indonesia.

Tasol em i tok em i no wanbel long kisim pawa saplai i kam insait long Indonesia taim PNG i gat planti ol samting long kamapim pawa.

“Mi no wanbel long dispela plen bilong kisim pawa kampani na pawa saplai i kam insait long Indonesia taim yumi gat pawa kampani bilong yumi yet, PNG Power, i stap long saplaim pawa long kantri,” Mista Duma i tok.

# Juffa laikim wok painimaut long marasin saplaia

GAVANA bilong Oro, Gary Juffa i laikim gavman long mekim wanpela wok painim aut i go insait long olsem wanem wanpela kampani i bin kisim kontrak long gavman long saplaim marasin long olgeta pablik haus sik long kantri.

Taim gavman i bin putim wanpela tenda long yia 2012 long saplaim marasin na ol haus sik saplai long ol haus sik long olgeta hap bilong kantri, wanpela kampani (haitim nem) bin winim tenda na kisim dispela bikipela kontrak long Nesenel Dipatmen ol Helt.

Mista Juffa i tok em i painim aut olsem dispela marasin saplaia i save kisim ol marasin long

wanpela kampani long Saina.

Em i autim dispela tok tok long Palamen long Trinde long dispela wik.

“Mi sekim World Health Organisation (WHO) na painim aut olsem WHO i tambuim dispela marasin kampani long Saina long mekim bisnis wantaim ol.

“Ol i bleklistim dispela famasitikel kampani bilong Saina. Ol haus sik bilong mipela i wok long kisim ol marasin na haus sik samting i kam long Saina we dispela kampani i mekim,” Mista Juffa i tok.

Em i laikim gavman long mekim wanpela wok painim aut long sekim sapos dispela kampani bilong PNG, husat i

kisim kontrak long Helt Dipatmen, i save baim ol marasin long Saina.

Praim Minista Peter O’Neill i tokim Mista Juffa long raitim wanpela pas i go long opis bilong em, na bai askim kabinet long larim wanpela bikipela wok painim aut i kamap.

“Dispela gavman i bin kamapim fri helt polisi na dispela polisi em i namba wan taim mipela i kamapim bihain long 40 yia.

“Yes, helt na haus sik em i namba wan prairiti bilong dispela gavman na mipela bai putim helt bilong ol pipel i go pas.

“Gavman i bin givim kontrak long dispela kampani bilong PNG long saplaim marasin na haus sik samting long ol pablik haus sik bilong yumi.

**TOKAUT NAU!!**

**Special Features and Supplement**

The best way to get the information to the mass populace in PNG and get it delivered right into the remotest villages by publishing in Tok Pidgin "Wantok niuspepa".

Get the grassroots people involve in taking ownership of developments in business, Health, Education, Politics, Agriculture, Climate Change, Banking, Law Order and more etc.

Wider distribution networking in the country using the four mainline churches (Catholic, Lutheran, Anglican and the United Church of PNG) Wantokniuspepa goes to remotest places and villages where other news papers don't reach.

Very affordable advertising rates, longer shelve life and many more pass on readership.

Your special events, achievements, product, services or information can be read, call us now!

**Ph: 325 2500 Fax: 325 2579**

Email: [lbents@wantokniuspepa.com](mailto:lbents@wantokniuspepa.com) Mobile: 75530581  
[tekari@wantokniuspepa.com](mailto:tekari@wantokniuspepa.com) Mobile: 71963704  
[sfarapo@wantokniuspepa.com](mailto:sfarapo@wantokniuspepa.com) Mobile: 76622895  
 Advertising Mobile: 73846688



# Ol polis long Mamose rijon i sot long haus slip

James G. Kila i raitim

**ASISTEN Polis Komisina bilong Noten Komand, Peter Guinness i tokaut olsem hevi bilong haus slip bilong ol polisman meri long Mamose rijon em i wanpela bikpela hevi tru.**

ACP Guinness i tokaut long dispela i no longtaim i go pinis long ol nius lain long Madang. Em i tok olsem Polis Dipatmen i luksave long dispela hevi na em bai toktok wantaim Madang Provinsal Polis Komanda (PPC), Jacob Singura long painim sampela kain rot long helpim ol polis long Madang provins.

Long las mun tasol ol yangpela polisman husat i bin stap long wanpela gest haus long Madang i muv i go insait long nupela singel polis bareks we i stap baksait long Jomba polis stesin. Ol i muv i go long hap bikos rent long gest-haus i bin antap tumas na Polis Dipatmen na Madang provinsal gavman i no bin baim long taim stret.

Madang provinsal gavman stat long mun Oktoba las yia i bin helpim Polis Dipatmen long baim rent bilong ol yangpela polisman meri.

Dispela ol yangpela probesinari konstabol nau i



Nupela singel bareks bilong ol polis baksait long Madang Jomba polis stesin.

muv i go stap pinis long nupela singel bareks baksait long Jomba polis stesin.

ACP Guinness i tokaut olsem dispela nupela singel bareks i no redi gut, tasol ol lain polis opisa bai go stap pastaim long hap inap polis dipatmen long hetkwata i ken helpim bihain.

Mista Guinness i tok olsem ol nupela polis rikrut bai go wok long Ramu Sugar, tasol long nau yet ol bai gohet na wok stap long Madang insait long tupela yia probesinari trening bilong ol.

Insait long arapela polis nius, Madang PPC, Suprinten-

den Jacob Singuar i askim olgeta pipel bilong Madang long wok bung long daunim lo na oda hevi long provins na mekim ples i stap gut long ol pipel i ken amamas long en.

Em i mekim dispela toktok taim planti pret i wok long stap long provins long sait long lo na oda hevi.

Suprintenden Singura i tok lo na oda em wok bilong olgeta lain long luksave long en na ol pipel i mas helpim polis wantaim infomesin long bringim ol lain i mekim rong i go long han bilong lo.

PPC Singura i tok olsem lo

na oda em i no wok bilong polis tasol long mekim. Olgeta manmeri insait long komyuniti i mas strongim wok bilong lo na oda na helpim polis long ripot long wanem hevi i kamap na dispela bai i ken mekim komyuniti i stap orait.

Em i tok olsem Madang i wok long kisim nem nogut long sait long lo na oda, tasol dispela i ken senis taim olgeta lain long komyuniti na ol stekholda i putim tingting wantaim na wok bung na daunim lo na oda hevi. Dispela bai bringim bek gutpela nem bilong Madang.

## UOG i bilip long kisim helpim

Charlpetson Koi i raitim

INSAIT long tripela wiknau, yunivesiti bilong Goroka i statim skul pinis na ol sumatin na ol wok lain i go bek pinis.

Yunivesiti bilong Goroka (UOG)Sensela, Joseph Sukwianomb,i tok ol i go insait long tripela wik nau tasol ol i no kisim wanpela mani long gavman yet.

“Gavman i toktok long dispela disisen long NEC long givim mipela K8.5 milien we mipela i wet long en stap,” Sensela Sukwianomb i tok.

Em i tok tupela yunivesiti i kisim pinis K1 milien tasol ol i go het long yusim ol intanel revenu long baim kaikai bilong ol sumatin, pawa na wara pemen.

Sensela Sukwianomb i tok, “Ol sumatin i statim tising prektis na wok long ol indastri-tising prektis long las wik.”

“Gavman i mekim dispela promis long sapatim mipela na mipela i wet tasol long dispela promis bai karim kaikai,” Sensela Sukwianomb i tok.

Tasol, em i tok UOG i bilip olsem gavman bai kam gut wantaim tokok bilong ol na

karim kaikai long helpim ol long sait bilong mani long dispela wik o neks wik.

Em i tok bai i negat holide i kamap bikos tupela semesta bai go het.

UOG i kamapim pinis wanbel namel long NEC na ol sumatin we ol sumatin bai go het long greduet long neks yia na pinisim 2016 akademik yia.

### UPNG i ken kisim fom bilong skul gen

VAIS Sensela bilong Yunivesiti bilong Papua Niugini, Profesa Albert Mellam, i tok olsem ol (UPNG Kansel) i tingting hat long mekim dispela disisen bilong ol sumatin long go bek long skul insait long Waigani naTaurama kempas.

“Mipelai mekim dispela disisen tasol em i wok bilong edministresen we em i kisim bikpela gutpela tingting long luksave olsem ol sumatin no inap lusim skul o penelais na long stretim ol dispela bikos bihain long kisim ol sumatin, bai mipela tingting long rum bilong ol, kaikai bilong ol .

### LLG Kaunsila bai kisim mani

MOA long 6, 000 Lokal Level Gavman (LLG) Kaunsila insait long kantri bai kisim mani long gavman, Deputi Praim Minista Sir Leo Dion i tok.

Mista Dion, husat i Minista bilong Inta-Gavman Rilesens, i tok ol LLG Kaunsila long ples i save mekim gutpela wok wantaim pipel tasol gavman i no bin luk-

save gut long wok ol i save mekim long komyuniti level.

Sir Leo i tok dispela gavman nau i givim luksave long ol na bai peim mani long planti ol gutpela wok ol i save mekim long larim bel isi na gutpela sindaun i stap long ples.

Gavana bilong Sauten Hailans William Powi i bin harim dispela nius na

i wanbel stret.

Mista Powi i tok planti ol LLG Kaunsila long provins bilong em i harim dispela nius na i wanbel stret long dispela gavman.

“Ol LLG Kaunsila long Sauten Hailans i wanbel long dispela nius. Mi laik askim sapos Minista bilong IntaGavman Rilesens i ken toktok moa long dispela.

“Em i nupela gavman polisi o nupela lo o em i olsem wanem? Ol bai kisim potnait mani o wanem kain mani tru bai ol i kisim,”Mista Powi i askim.

Sir Leo i tok em bai mekim wanpela stemen long Palamen long tok kliia long dispela plen bilong gavman long peim ol LLG Kaunsila.

## CEPA opisa bai go long wanpela kalsa skul long Japan

TINGTING bilong lukautim kalsa na ol tumbuna pasin bilong Papua Niugini i bikpela, Andrew Angobe, eksekeutiv dairekta bilong PNG Nesanel Komisen bilong UNESCO i tok.

Em i mekim dispela tok long taim em amamas long Jim Onga, bilong Konsevesen na Envairomen Proteksen Atoriti (CEPA) long go long dispela skul.

Dispela skul bai lainim na lukautim pasin tumbuna bai kamap long Japan long 30 Ogas i go inap long 29 Septemba, 2016.

PNG husat i memba bilong Wol Herites Konvensen I bin kisim askim long em i makim wanpela opisa long go long skul bilong lukautim ol pasin kalsa na busgraun bilong kantri.

Angobe i tok as tingting bilong PNG i go long dispela skul em long em i gat save bilong lukautim ol kalsa na tumbuna hap we em i ken lukautim.

Wantaim long dispela em i gat save bilong lukautim busgraun we i gat nem long tumbuna.

Dispela opisa husat i go long dispela skul bai lainim ol arapela long kantri na rijon long save em i kisim long dispela skul.

Dispela skul em kalsurel afeas bilong Japan, Esia-Pasifik Kalsurel Senta bilong UNESCO, Intenesenel Senta bilong Stadi bilong Kalsurel Herites, Nesanel Risets Institut bilong Kalsurel Propeti (Tokyo na Nara) na Gavman bilong Japan.

Angobe i tok i gat sampela sotpela skul, woksop na kibung we bai kamap long bihain taim long wan wan ol rijonal hetkwata na opis bilong em bai redi long salim moa opisa long go long dispela ol skul.

## UPNG i bilip long statim skul gen

Charlpetson Koi i raitim

VAIS Sensela bilongYunivesiti bilong Papua Niugini (UPNG), Profesa Albert Mellam i bin tok tenkyu long Minista na dipatmen bilong en Risets, Sains, naTeknoloji (DHERST) long helpim yunivesiti wantaim invesmen bilong K1 milien.

Profesa i tok, “Ol sumatin bai i go insait long skul long dispela wik Sarere na akademik yia bai i stat long Septemba 5 long dispelayia we Kansel i tokorait,” ProfesaMellam i tok.

Em i tok tupela kondisen we kaunsil i setim long statim akademik em, long lukim gen asesmen long hevi bai i kamap long ol sikyuriti sait we yunivesiti i karimaut long ol kampani i save givim sikyuriti sevis na ol sekyuriti bilong mipela yet long luksave long wanem hap em ol hot spot o hap i no seif long skul eria.

“Long sait bilong ol risos long sapat bilong gavman long fainens em i bikpela samting tru long statim akademik yia na sapat bilong gavman long K12 milien em i bikpela samting tru,” Profesa Mellam i tok.

Em i tokim Minista Marus olsem taiming em i bikpela samting tru na em i amamas long Minista long soim lidasip ba i em i ken helpim ol long kisim mani hariap long statim akademik yia hariap.

“Mipela i redi long kisim ol sumatin bilong mipela, mipela i gat program i stap long kamapim wanbel. Bai mipela gat kaunsiling bilong ol sumatin na ol wok lain taim mipela i go het long statim skul,” Profesa Mellam i tok.

Profesa Mellam i tok, “ Mipela i no inap senisim samting i kamap pinis tasol mipela i ken lainim long en na go het.”

Em i makim maus bilong UPNG na tok welkam long ol sumatin bek long yunivesiti na tok tenkyu long gavman long helpim wantaim mani.



# Warrior Industri na Filipino Asosiesen helpim sios



L-R Franci Fajardo (Brens Menesa Warrior Industri), Pastor Monsito, Mis Inday Gabuya, Presiden Filipino Asosiesen, Benny Mendoza, Vais Presiden, Filipino Asosiesen.

## Frieda Sila Kana i raitim

**OL gutpela Samaritan insait long komyuniti i save stap na strongim ol komyuniti na ol wok marimari insait long Papua Niugini.**

Tupela bilong ol dispela lain em long Warrior Industri we i save kamapim na salim ol Warrior Tank na ol Filipion Asosiesen bilong PNG.

Long Sarere 19 Ogas dispela tupela lain i bungim han na

donetim wanpela wara tenk inap long holim 5,500 lita wara i go long Living Lait Foskwea Sios long Kaugere insait long Pot Mosbi Saut ilektoret.

Dispela em i namba wan taim long dispela sios i kisim wanpela helpim long wara tenk we klostu long 2,000 memba bilong Living Lait Sios wantaim ol sumatin bilong Living Lait Akademi, Living Lait Baibel Skul, Living Lait Moale Kaikai program na Meri Seif haus bai

yusim long olgeta wik.

Brens Menesa bilong Warrior Industri, Francis Fajardo wantaim Presiden bilong Filipino Asosiesen, Inday Gabuya wantaim Vais Presiden bilong en, Benny Mendoza i bin stap long givim dispela wara tenk i go long Pastor Lorenzo, Prinsipal bilong Living Lait Baibel Skul husat i makim Senia Pasto Rodney Tomuriesa long kisim dispela tenk.

Pektori bilong Warrior Industri em i stap long Malahang long

Lae siti tasol ol i gat ples bilong salim ol distribusen senta long Gabaka Strit long Gordons Industri eleria.

Ol i save salim ol wara tenk slim lain kain olsem 1,000 lita, na 3000 lita, wantaim septic tenk em 3500 lita wantaim 5,500.

Narapela lain wara tenk oli salim em long N-series em long 3,500 lita, 5,500 lita na 9,500lita.

Olgeta tenk wara na septik tenk bilong Warrior Industri em i Australia na Nu Silan standet tasol.

# Digicel Faundesen bungim ol patna na benefiseri

## Frieda Sila Kana i raitim

DIGICEL Faundesen i bhainim lek mak bilong komyunikesen sistem bilong en we ol digicel tawa na mobail fon i go long en na em i go bringim wok marimari long ol pipel long rurel ples na long ol skwata setelmen long taun na tu long ol tarangu pikinini.

Long las wik Digicel i bungim ol komyuniti patna bilong en wantaim ol midia o nius lain long ol dispela lain i stori long wanem kain gutpela wok marimari ol i save mekim long ol komyuniti na tu long wanem kain helpim Digicel Faundesen i save givim.

Long dispela taim, Program Kodineta bilong WeCare Faundesen, Josephine Dromenge wantaim sosel wokmeri, i bin stori long ol komyuniti patna bilong ol long ol setelmen long Pot Mosbi olsem WeCare grup long Morata 4, Cheshire Homes na wanpela mama long 8-Mail.

CEO bilong Digicel Faundesen, Beatrice Mahuru i tok tenkyu na mekim luksave long Fr. John Glynn, Dairekta na Faunda bilong WeCare wantaim ol gutpela wokmeri bilong en na ol lain long komyuniti we i save lukautim ol liklik pikinini long givim ol skul, kaikai na lukautim helt bilong ol.

"WeCare Faundesen i bin stat wantaim mipela na ol wok ol i save mekim long komyuniti em i

namba wan. Wanem hap han bilong Digicel Faundesen i kam stop long komyuniti em ol i save karim i go moa yet. Mipela i amamas long ol," Mis Mahuru i tok.

Em i mekim luksave tu long ol gutpela lain bilong Cheshire Disabiliti Senta we i save mekim gutpela wok long stretim bodi bilong ol pikinini husat i kisim bagarap long sampela hap bilong bodi bilong ol na tu long lainim ol long rit na rait. Sampela taim ol WeCare i save painim ol kain pikinini long komyuniti we i gat hevi long bodi bilong ol, na ol i no inap long helpim ol olsem na ol i save kisim ol i go long Cheshire Disabiliti Senta. Long hap em ol i gat ol tisa husat i gat trening long lainim ol dispela kain pikinini we i gat hevi long bodi bilong ol.

"Ol Cheshire lain i save wok long wanpela kain hap we i hat long yumi ol narapela inap long mekim. Tasol ol i save wokim wantaim smail long pes na mipela i laik mekim luksave long Sylvia na ol tim bilong em," Mis Mahuru i tok.

Long dispela taim, wanpela bilong ol mama husat i gat bikpela nid long helpim bilong WeCare em, mama Maiki Houra bilong Ihu long Wes Kerema tasol nau i save stap long ATS long Pot Mosbi. Em i gat wanpela pikinini Maria husat nau i gat 16 krismas tasol em i no save wokabaut na i no inap long helpim em

yet. Stori bilong em i bin brukim bel bilong olgeta lain husat i bin stap long dispela taim. Maiki i save salim ol pis long ATS maket long lukautim pikinini bilong en. Em i save go long taun na baim pis long bris na karim long bek i kam senisim bas tripela taim olgeta inap em i save kamap long ATS we em i putim long maket.

Wanpela bilong ol Man ov Ona, Tuem Mugang Narewec bilong Jiwaka i bin sori tru long dispela meri na long wankain yet em i donetim wanpela liklik solar pawa sasa i go long mama Maiki.

"Mi harim stori bilong yu na mi sori tru olsem na long liklik wei mi inap helpim yu em mi laik givim yu dispela solar pawa sasa we i gat 4-pela lait long en na yu ken sasim mobail fon bilong yu. Mi ken helpim yu wantaim sampela bilong dispela prodak tu long salim na yu ken putim liklik makap antap long prais bilong en," Mista Narewec i tok.

Mista Tuem Mugang Narewec em i 2015-2016 Digicel Man ov Ona na em i papa bilong kampani bilong em yet long salim dispela Waka Waka Solar Power.

Digicel Faundesen i bin bringim ol Man ov Ona i kam long dispela bung tu bikos ol i bin wok long stap long wanpela trening kos long Digicel Lening Senta long Gordons yet long las wik.



Ol Warrior Tenk em ol i wokim long Australia na Nu Silan Standet tasol. Foto: Frieda Sila Kana.



L-R Edna Wenum, Mama lukaut bilong ol pikinini bilong Morata 4 WeCare grup, Maiki Houra i holim nupela solar pawa sasa bilong en, na Tuem Mugang Narewec, bos bilong Waka Waka Solar Pawa long kantri i givim dispela solar pawa long Mama Maiki.

Foto: Nicky Bernard.





## INVESTMENT TOKTOK

wantaim DR. STEPHEN NASH


**Moa hevi bilong ikonomi bai kamapim ol liklik mani tasol long ol invesmen**

Sapos yu gat askim, plis salim i kam long toktoksuper@nambawansuper.com.pg na mipela bai bekim.

Long 31 Julai 2016, Dipatmen bilong Treseri i putim aut Mid Yia Ikonmik na Fiskal Autluk (MYEFO). Sampela samting insait long dispela ripot, we ol lain husat i laik lukim gutpela invesmen bilong PNG long bihain taim, o long sotpela taim, i stap long dispela sotpela toktok. Wantaim ol narapela samting, dispela toktok i soim ol kain hevi nau i stap long PNG ikonomi, na tu i soim piksa bilong ol wankain samting olsem bai kamap bihain hevi bilong ikonomik taim bilong PNG. Bai mi tok klia moa long sampela astingting bilong MYEFO, bilong 2016, em i olsem:

- **Komoditi prais fokas i pundaun:** Komoditi prais i no fokas long go antap na lukluk long oil prais em bai i go daun bikpela tru, long 2016 baset plen bilong USD54 pe barel, i go long USD 43 pe barel long MYEFO mak bilong,
- **GDP fokas i pundaun:** Lukluk bilong GDP em ol i daunim gen long 2016 baset mak bilong 4.3 pesen i go long 2.2 pesen long mak bilong MYEFO,
- **Inflesan fokas i go antap:** Fokas bilong inflesan i go antap gen, long 5.7 pesen bilong 2016 baset, i go long 6.6 pesen long lukluk bilong MYEFO, na
- **Revenu fokas i pundaun:** wanpela hap bilong baset we ating yu laik save long en, em long husat lain i save laik lukluk long strong bilong PNG ikonomi i go yet, em ol revenu fokas. Ol dispela bikpela lukluk bek wantaim piksa graf i soim ol hevi we ikonomi i stap long en long dispela taim, olsem:
  - lukluk bilong takis revenu i go daun long 2016 baset wantaim 16 pesen,
  - lukluk bilong inkam takis bilong wan wan manmeri i go daun long 2016 baset olsem 12 pesen,
  - lukluk bilong kampani takis risit i pundaun long 2016 baset wantaim 20 pesen samting,
  - ol takis bilong ol samting long stua na ol sevis tu i go daun long 2016 baset wantaim 18 pesen, na
  - maining na petroleum takis i pundaun long 2016 baset, o long mak bilong 32 pesen.

Na ol dispela bikpela pundaun i no kamap long ol wan wan kategori tasol, only nogat, ol rot bilong revenu o mani kam insait tu i senis olgeta. Yu ken lukim long lain graf piksa daunbilong long ol as bilong ol takis revenu i senis,



Piksa 1  
Long piksa, yu ken lukim bikpela pundaun long mineral na petroleum revenu, o "min pet", olsem wanpela pesen bilong olgeta revenu, long Piksa 1, na tu long ol takis bilong ol samting long stua na ol sevis i go antap, olsem wanpela hap bilong olgeta takis mani. Wantaim ol kain bikpela pundaun long mineral na petroleum reve-

ni, em i bin laki sans olsem ol takis long ol samting long stua na ol sevis revenu i bin stap wankain tasol; ating bikos long ol enfosmen wok we ol intenal revenu komisen i wokim.

Tasol, insait long tupela yia samting, hevi bilong ol takis long ol samting bilong stua na ol sevis, insait long as bilong ol revenu long PNG Stet, i bin go antap klostu long 19 pesen bilong ol takis revenu, na kisim mak bilong 29 pesen. Long wankain taim, revenu bilong maining na petroleum i wok long go antap, kamdaun palnti taim tumas; em i bin stat long 7 pesen i go antap klostu long 15 pesen long 2015 baset estimet, nan au em i pundaun gen i go daun olgeta long no gat wanpela kontribusen tru. Dispela em ol samting ol bikpela senis long ol as bilong revenu, bilong PNG Stet. Bilong mekim dispela as bilong reveui i go isi long i no ken bagarap tru, ating em bai stap olsem bikpela tingting bilong gavman, long go het.

Tasol maski i gat bikpela senis i kamap long as bilong ol gavman revenu, ol i wok long tromoi mani yet long bikpela mani mak tumas. Kain olsem, Treseri i tingting olsem ol mak bilong dinau bai i stop long 32.2 pesen bilong GDP, we i stap antap moa long mak we lo i tok orait long en. Dispela i minim olsem, wantaim ol narapela samting, ol i mas wokim wanpela saplometri baset long daunim mak bilong ol mani we ol i wok long tromoi long ol i ken holim ol mak bilong dinau na bai i no ken go antap moa yet. Hia em wanem samting Treseri i makim,

### Pinisim Toktok

Sapos ol revenu bai i wok long pundaun yet, orait em bai minim olsem em i makim narapela sain bilong wanpela taim bilong risesen o wok bilong ikonomi long PNG i no gutpela tumas. Katim daun ol mani we gavman i wok long tromoi long wok, olsem Treseri i bin makim, wm bai gutpela tingting i ken kamap long toktok moa long taim bilong risesen long PNG. Kain taim bilong hevi olsem bai mas go yet na bai kamap long mak bilong domestic invesmen we i slek na i no strong tumas, na go het, bikos wok bilong invesmen i soim ol gutpela samting o mani we i stap long wanem kain ikonomi we i stap aninit. Na tu sapos namba tu LNG projek inap, long go het long pinis bilong 2017 kalenda yia, e mating ikonomi na invesmen we i soim ol strong bilong ikonomi bai kam bek gen, sapos tupela wantaim i go antap gut.



Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

**BIGGER, BETTER, SAFER, STRONGER AND STILL NUMBER 1**

# Goroka MP sapatim Goroka haus sik

OL bod, menesmen na woklain long Isten Hailans Provinsal Helt Atoriti (EHPHA) na Goroka Provisal Haus sik wantaim ol siklain na ol pipel bilong Goroka i amamas tru long luksave olsem lokal MP na memba bilong Goroka Bire Kimisopa i stat long givim sapat nau long stretim gut wod 4 na 5 long haus sik.

Nau yet, Kimisopa i fandim na stretim pinis ol toilet na waswas rum long wod 4. Na ol wokman bilong stretim gut wod i muv nau i go long stretim wod 5 we ol man na meri husat i gat sik mental (longlong) i save i go long en.

"Opis bilong mi i gat komitmen long mekim long givim sapat long haus sik, long wanem, ol siklain i mas kisim gutpela sevis, i no long marasin na ol arapela



Lokal memba bilong Goroka Bire Kimisopa i strongim toktok bilong em wantaim Ekting Sif Eksekutiv Opisa bilong Isten Hailans Provinsal Helt Atoriti Joshua Soso (Ilephan) long wok bilong Goroka Provinsal Haus sik long Isten Hailans.

Poto: Loutova Siapea.

helt sevis tasol, long sait bilong ol toilet na baturum tu", Kimisopa i tok. Em i tok, ol siklain i save i go long ol haus sik long kisim marasin na ol arapela sevis long kamap orait gen.

"Sapos mipela i ken givim gutpela sevis long mekim ol i kamap orait gen, mipela i mas stretim gut ol toilet na baturum tu we bai i ken helpim tu ol siklain", Kimisopa i tok.

Em i tok, opis bilong em bai givim sapat long ol kain institusen olsem helt na edukesen sekta, long wanem, sapos tupela sekta i wok gut, ol pipel bai i ken kisim gutpela sevis tu.

## Digicel Faundesen helpim pikinini husat gat hevi long bodi

NOGAT wanpela pasin nogut moa long pasin bilong pasim ai long wanpela i no ken save long nid bilong ol husat lain i gat hevi long bodi.

Kain lukluk bilong planti sosaiti i mekim sampela papamama bilong ol pikinini husat i gat hevi long bodi long ol i mas traime hat moa, maski laip i hat, long ol i helpim pikinini bilong ol i stap amamas.

Tally Kandia, 6, na Manu Saun, 9, i gutpela piksa bilong ol pikinini husat i traime olgeta wei long stap amamas, maski ol i gat hevi long bodi.

Digicel Faundesen i bin painim tupela pikinini long Chesire Disabiliti Sevises Senta, Hohola, we em i painim tupela i wok long hatwok long strongim tupela yet long stap gut.

Tupela i painim hat long sindaun, sanap, wokabout o toktok gut.

Tupela i kisim hevi long bodi bihain long tupela i kisim tubekulosis (TB) long taim tupela i mangi yet.

Tasol wantaim helpim bilong Faundesen tupela pikinini wantaim sapat bilong ol papamama bilong ol i bin



Tally kisim ekksesais wantaim nupela kain samting bilong stretim lek na baksait.

inap long mekim gutpela sevis long stap bilong tupela long las 6 i go long 10-pela mun. Nau tupela i ken sindaun, sanap na wokabout liklik wantaim helpim bilong ol arapela.

Beatrice Mahuru, sif

eksekutiv opisa bilong Faundesen i amamas long wokbung namel long Chesire Sevises Senta na ol papamama long lukim dispela sevis long stap bilong tupela pikinini.

Mahuru i tok bihain long kamap bilong

Tally sindaun long sol bilong papa bilong en na i sanap wantaim mama bilong en.

Faundesen long 2014, em i bin givim inap olsem K150,000 long ol manmeri husat i gat hevi long bodi long Chesire Disabiliti Distrik na Sentral provins.

Long amamas na tok tenkyu long Chesire Disabiliti Sevises, jeneral menesa Benard Aiyeko i tok lukluk bilong Sevises nau i bilong strongim wok ol i bin kirapim long 2015 na 2016 i go long ol taim bihain.

Sevises i tingting long wok bung wantaim olgeta komyuniti long kisim sapat bilong ol tu long strongim wok bilong em.





## Tok Pisin – tokples i bungim yumi

Planti yumi i save yusim Tok Pisin long toktok wantaim wanpela na narapela.

Long taun na siti insait long Papua Niugini planti famili yusim tasol Tok Pisin olsem namba wan tokples blong ol.

Tasol yumi save dispela Tok Ples i kam olsem wanem?

Long save moa yumi mas go bek long taim bilong plantesin.

Taim ol Jemani i bin kam long Papua Niugini stat long yia 1883 ol i bin sindaun long hap bilong Madang, Sepik na Rabaul. Dispela ol hap i kamap olsem Jeman Niugini.

Ol Jeman i bin kisim graun na kamapim draipela ol plantesin kokonas na kakao. Ol i nidim wokman long mekim wok long plantesin na ol i mas go long ol ples na kisim ol man.

Planti taim ol i no kisim man long gutpela pasin. Sapos man i les ol i save paitim na pasim long rop na pulim ol i go na putim ol long wok. Taim dispela i kamap ol i save brukim ol famili na kisim ol man na papa bilong famili i go long wok long longwe ples.

Seim taim ol Jeman i bin kisim graun na kamapim ol kokonas plantesin tu long kantri Samoa. Ol i kirap na salim sampela wokman, ol man bilong Papua Niugini i go wok long plantesin long Samoa. Dispela em namel long yia 1879 i go 1912.

Planti dispela lain i no save long narapela tokples. Ol i save long tokples blong ol yet.

Tasol ol i mas toktok namel long ol yet na wantaim ol pipel bilong ol arapela ples olsem Samoa yet, Kiribati, Vanuatu na Solomon. Ol i mas toktok wantaim ol bos bilong ol tu – ol lain Jeman.

Em nau Tok Pisin i stat long gro. Ol i kisim wan wan tok long tokples bilong ol Polinesia, na bungim sampela bilong ol Jeman na bungim tu planti bilong tok Inglis.

Ol man bilong Vanuatu na Solomon Ailan i bin go pastaim tru pinis na wok long ol suga plantesin long Kens long Australia. Bihain planti yia pinis na sampela man long Papua Niugini tu i bin go wok long dispela ol suga plantesin.

Bihain sampela dispela ol man bilong Papua Niugini, Vanuatu na Solomon Ailan i bin go gen na wok long ol plantesin long Samoa. Taim dispela ol lain i bung Tok Pisin i gro moa yet na sampela tok i bihainim nek bilong ol sampela tokples bilong ol man i toktok.

Taim ol man ya i pinisim wok kontrak bilong ol na go bek long ol asples bilong ol, ol i bin karim Tok Pisin wantaim i go. Planti ol man ya i bin go stap 3-pela or 5-pela yia na bihain ol i go bek long ples.

Planti i bin kam bek bihain tasol long namba tu Wol Woa. Seim taim long Papua Niugini bihain long dispela woa planti pipel insait long ol ples i lusim ples na go long taun. Dispela i kamapim nid bilong wanpela tokples we olgeta inap yusim. Papua Niugini i gat moa long 860 tokples na em bai i hat tru long toktok namel long ol yet insait long taun.

Tok Pisin i painim gutpela nupela graun bilong gro na hariap tru em i kamap bikipela.

Long taim bilong Independens long 1975 nupela gavman bilong Papua Niugini i bin luksave long Tok Pisin na mekim em i kamap olsem wanpela Opisiel Tok Ples bilong dispela nupela kantri. Tok Pisin i kamap nau olsem tokples bilong wok gavman, wok politik, wok bisnis na tu long autim tok bilong Baibel.

Tasol i gat hevi long dispela tokples – Tok Pisin. Long yia 1953 Yunaitet Nesen i bin laik rausim dispela tokples. Astingting em olsem Tok Pisin em i tokples we i kamap aninit long lukaut bilong ol koloniel lain olsem Jemani na Briten.

Yunaitet Nesen i bin luksave long ol pasin nogut ol Jeman na Britis i bin mekim long ol pipel i gat blak skin.

Tasol Tok Pisin i bin kamap olsem wanpela tokples we i bungim planti pipel bilong narapela narapela tokples. Em i bin tokples we ol wokman bilong ol plantesin i yusim long tokaut long ol pasin nogut ol i bin bungim taim ol i stap wok long ol plantesin.

Tok Pisin em i stap 150 yia pinis tasol em i wok long indai i go. Dispela em i orait? Ating yumi laik holimpas dispela tokples? Sapos olsem bai yumi mekim wanem?

# Askim i go long ol sumatin long lainim moa baibel

LONG 18 Ogas, Don Bosco Teknikel Koles i pinisim wan wik 31 Faundesen De selebren bilong skul wantaim Baibel Kwiz na Veraiti So.

Baibel Kwiz em skul i holim wantaim Baibel Mun bilong Pot Mosbi Katolik Asdaioses.

As tingting bilong dispela kwisz em long helpim ol sumatin long save gut moa long baibel, laikim na amamas long tok i stap.

Long dispela kwis na so Don Bosco i askim ol brata skul olsem St Charles Luanga Sekendari Skul, Karitas Teknikol Sekendari na Jubilee Sekendari Skul. Dispela ol skul i joinim Don Bosco long stap insait long amamasim dispela de long Gabutu, Pot Mosbi.

Program i bin stat wantaim danis.

Bihain long dispela Fr Angel Sanche, SDB, het tisa long Don Bosco i opim kwis na so.

Long tok bilong en, Fr Angel i tokaut long laik bilong fauna bilong dispela skul laip olsem em i man bi-



Don Bosco i askim ol brata skul olsem St Charles Luanga Sekendari Skul, Karitas Teknikol Sekendari na Jubilee Sekendari Skul long bung wantaim Don Bosco long stap insait long amamasim Buk baibel wik wantaim wanpela baibel kwiz long Gabutu, Pot Mosbi. Foto: Fr. Ambrose Pereira, sdb.

long laikim, ritim, save na bihainim tok na skul bilong baibel.

Wantaim dispela em i tok Bosco i save paitim toktok long tok bilong baibel, histori na wei ol man i raitim baibel i tanim tok.

Bihain long dispela Baibel kwis i kamap. I bin gat tripela raun we i stat wan-

taim ol isipela askim na bihain i go long ol hatpela askim.

Bihain long dispela ol raun, ol kodineta bilong so i givim sans long ol lain husat i stap long bekim tu sampela baibel askim.

Bihain long baibel kwis resis, Jubilee Sekendari Skul i win na kisim namba wan prais na Don Bosco Teknikel

Skul i kisim namba tu prais.

Wantaim dispela ol foapela skul i kisim setifiket bilong stap insait long dispela resis. Ol sumatin husat i stap insait long grup bilong resis i kisim tu prais.

Veraiti So i bin kamap long wan wan taim bilong baibel kwis long taim bilong malolo.

## Ol namba wan sumatin i greduet long Kanauki Yunivesiti Senta

NAMBA WAN 8-pela studen bilong Kanauki Yunivesiti Lening Senta long Yangoru Saussia distrik long Is Sepik i bin greduet las wik. Tupela bilong ol no kamap long kisim hap pepa bilong ol. Dispela greduesen serremoni i bin kamap long Warasaua praimer skul na ol papamama na planti arapela pipel bilong distrik i bin kamap na lukim.

Ol studen i bin kisim ol kos long dispela senta stat long 2013 taim Yangoru-Saussia Distrik Developmen Atoriti i bin satim dispela program. Ol i bin kirapim dispela senta bikos i gat planti ol skul liva i stap nabaut husat i no gat sans long kisim moa save long ol bikipela skul.

Memba bilong Yangoru-Saussia long Palamen, Richard Maru i bin stap long dispela greduesen na em i tok amamaas long ol dispela namba wan lain greduet. Em i tok tenkyu long bikipela hatwok na sakrafais ol i mekim long winim dispela mak.

Minista i statim toktok na em i tok bikipela hevi tru bilong Papua Niugini tude em ol yangpela manmeri i no gat wok.

“Las yia, 25,500 studen i bin pinisim gret 12 na long dispela namba bilong ol stu-



Ol greduet sumatin i sanap kisim poto wantaim Memba bilong ol, Minista Richard Maru wantaim ol tisa bilong bilong ol.

den, 5,000 tasol i bin kisim spes long ol bikipela skul na yunivesiti na koles. Ol 18,500 studen o 80 pesen bilong ol gret 12 studen i bin go bek na stap nating bikos i no gat hop long bilong gutpela sindaun bilong bihain taim. Dispela em i bikipela hevi tru i bungim kantri bilong yumi tude,” Mista Maru i tok.

“M sori olsem ol nesenel lida i no bin luksave long dispela hevi. Ol i no laik toktok long en, tasol dispela samt- ing i tru na i stap ples klia long ai bilong yumi.

Sapos ol papamama i putim mani ong edukesen bilong ol pikinini, ol i mas luksave olsem namel long 10-pela studen, ol 8-pela bai i no inap long go

long ol bikipela skul na kisim save. Bai ol i go bek long ples,” em i tok.

Em i tokim ol papamama tu olsem tu olsem ol i investim bikipela mani na taim long edukesen bilong ol pikinini bilong ol, tasol olgeta pikinini bai i no inap winim bikipela skul na painim gutpela sindaun.

“Dispela em i trupela samt- ing PNG i mas luksave na traime stretim. Fri edukesen i bringim ol studen i go inap long gret 122, tasol “fri edukesen” tasol bai i no inap. Gutpela sindaun long Distrik, long provins na long kantri i hangamap long edukesen bilong ol yangpela pipel bilong yumi.

Edukesen i save mekim ol kantri i go het, senisim ol

ples na kirapim ol ikonimi,” Mista Maru i tok.

Em i tok em i memba bilong O’Neill/Dion gavman na em i amamas long fri edukesen polisi, tasol i mas gat moa helpim.

“Yumi no inap long gat planti tausens studen i drop aut long skul olgeta yia long taim populesen bilong yumi tu i wok long gro long olgeta yia.

Long 10-pela yia bihain, bai gat 1 milien studen i stap long gret 12 bikos long fri edukesen polisi na bai i no gat spes long ol bikipela skul long kantri.

Dispela bai kamapim bikipela moa hevi long taim planti bilong ol i raun nating na bai kamapim bikipela hevi tru long kantri bilong yumi,” Mista Maru i tok.



# Koek brukim banis

**LONG kain pasin kastom Papua Niugini i gat em i no isi long lukim meri i kisim wok bilong man.**

Tasol dispela no hat long Monica Koek, 36, husat i kisim wok olsem senia jioteknikel ensinia long Ok Tedi Main.

Koek i no longtaim i go pinis i kisim nius olsem em i bungim olgeta mak na inap greduet long kisim Masta digri long Ensiniaring Saiens – Jioteknikel Ensiniaring na Ensiniaring Jioloji long Yunivesiti bilong Nu Saut Wels, Australia.

Koek bilong Mendi, Sauten Hailans i stat wok wantaim Ok Tedi long 2009 na i no lukluk go bek long wok na tingting em i gat long skul i go moa yet long save na wok em i mekim.

Tripela krismas i go pinis Koek i statim stadi long masta digri long Ensiniaring Saiens.

Em i tok em i no bin isi taim em i mekim tripela wok long wankain taim; wok long main, stap olsem mama na lukautim famili na long stadi long Ensiniaring Saiens.

Olsem em yet i tok: "Ol wok



**Monica Koek, senia jioteknikel ensinia long Ok Tedi Main.**

na sakrifais i planti we wangepela i mas mekim."

"Maunt Fubilan we Ok Tedi i digim kopa na gol i no isi long mekim wok.

"Planti i skelim dispela wok wantaim long taim mi mas putim i pilim i bikpela salens na

ting mi longlong.

"Tasol long mekim wok bilong mi i isi long ples olsem Maunt Fubilan, kisim kain skul olsem i gutpela na mi amamas."

Koek i tok tenkyu long Ok Tedi long lukim em i go aninit long Ok Tedi ekstenelel trening pro-

gram long kisim helpim na pinisim skul bilong en.

Em i tenkyu tu long sapot bilong famili, ol bos na wanwok i givim long em long pinisim skul.

"Kamap long kain mak olsem i no win bilong mi tasol. Em win bilong olgeta wantaim long famili, kampani na kantri," Koek i tok.

Ok Tedi menesing dairekta Peter Graham i tok: "Mipela i amamas long mak Monica i kamap long em wantaim helpim aninit long Greduet Developmen Skim bilong kampani bihain long em i pinisim Jiolojikel Saiens digri wantaim Honas long Yunivesiti bilong Perth, Australia aninit long helpim bilong Australia Hai Komisen.

"Bihain long dispela skul tim lida bilong en i askim kampani long sponsaim em long kisim masta digri program na olsem kampani i sponsaim em."

Graham i tok Ok Tedi i kampani we i sapotim olgeta wokman wantaim, maski ol i man o meri long wok na tingting ol i gat long em.

## Madang gavman i no luksave long wok bilong ol meri

**James G. Kila i raitim**

MADANG Provinsal Kaunsil ov Wimen i no wanbel tru long Madang provinsal gavman bikos dispela gavman i no bin givim mani sapot o helpim long ol insait long foapela yia olgeta.

Presiden bilong Madang Provinsal Kaunsil ov Wimen, Mary Kamang i tok olsem maski olsem i gat wangepela meri i makim kaunsil long provinsal asembli, provinsal gavman i no luksave na helpim opis bilong ol.

Misis Kamang i kros tru na autim bel-hevi bilong em bikos MPCW em bodi we i makim maus bilong ol meri long provins, tasol ol i no inap long karimaut wok bilong ol bikos nogat mani sapot i wok long kam long Madang provinsal gavman.

Em i tokaut olsem

opis bilong em i wok long kisim helpim i kam long ol intanesinol dona oge-naisesin long karimaut ol wok bilong en, na dispela i no luk gutpela tumas na dispela i bringim sem long Madang provinsal gavman.

Bihain long em i autim belhevi bilong em, Misis Kamang i givim bikpela tok tenkyu bilong em i go long Oxfam Australia na Oxfam Nu Silan long sapot ol i wok long givim long helpim Madang provinsal kaunsil ov wimen long sampela ol program bilong en olsem jenda bes vailens.

MPCW em wangepela ejensi we i go pas long helpim long bringim aut wok long daunim famili na seksual vailens hevi long provins na em save wok klostu wantaim Konsaltativ Implementesin na Monitoring Kaunsil.

## Bilum meri...



**Florence Jaukae Kamel – Namba wan meri long PNG long kisim tumbuna bilum bilong Papua Niugini long go insait long wok bisnis na givim moa sans long ol meri long ples long Isten Hailans long kisim mani long samting ol i save laik long mekim na i kam long ol stret. Mis Kamel i wangepela namba wan disaina bilong bilum long PNG we i bin kamap pinis long Nu Yok, USA Fashion Runway o ples we ol disaina bilong ol klos i save go soim ol stail klos bilong ol we ol bisnis lain bilong salim moa bai ai gris na putim oda long baim. Em i bin wangepela bilong ol 8-pela bikpela klos disaina long PNG husat i bin bringim ol prodak bilong ol i go long PNG Fashion Wik Ranwe o pared we i bin kamap long Stanley Hotel long Sarere las wik. Hia em i stori long wokabaut bilong em i go long Nu Yok na Englan long taim bilong pinis bilong wangepela tripela de woksop long las wik.**

*Poto: Frieda Sila Kana.*

## SAVE na MEKIM

**Sapta 2**

**...moa yet long hap 1(Kaukau)**

## Fok baira

**Narapela tul i stap, nem bilong en fok baira. Em i gutpela bilong mekim kain kain wok. Na em i gutpela tu bilong wokim maunten long gaden kaukau. Em i hapkas bilong fok na baira na rek. Sampela i gat tripela tit, sampela i gat fopela.**

### MEKIM WANEM LONG KAUKAU

Namba wan wok bilong kaukau em i bilong yumi kukim long sospen o long paia na yumi kaikai. I gat sampela arapela rot tu bilong kukim kaukau. Kain rot olsem: Kukim long gris. Narapela: Wokim plaua long em pastaim na bihain kukim. Na i gat rot bilong mekim drai tu.

### Gutpela pasin bilong sapim kaukau

Mipela save lukim ol sampela mama, taim ol i sapim kaukau. Ol i save sapim bikpela hap kaukau wantaim skin i go long pipia, na ol i kisim namel bilong kaukau tasol na kukim. Dispela pasin em i no gutpela tumas.

Olgeta gutpela samting bilong kaukau em i stap klostu long skin bilong en. Namel bilong kaukau em i samting nating. I no gat protin na vitamin i stap long namel bilong kaukau.

### Gutpela rot bilong kukim kaukau em i olsem: Wasim gut tru na kukim wantaim skin.

Sapos yu laik sapim, orait, tekewe skin tru, em tasol, na no ken sapim hap kaikai bilong en i go long pipia wantaim skin.

Fok baira





# Don Bosco amamasim 31 yia long PNG



**Yut, Meri na Famili**  
*Pastor Barbara Lunge*

## Pawa insait long yuniti

I GAT bikpela pawa long taim ol pipel i sanap wantaim na wanbel long inapim wanpela plen o driman bilong ol o visen bilong ol. Program wantaim visen i mas bilong nesen bilong yu o projek bilong yu. Yu mas wokim wantaim gutpela tingting.

PNG em i kantri we i gat 1000 traib na 850 tokples. Tasol God tasol inap long bungim yu wantaim narapela lain long mekim ol wok bilong yu wantaim wanbel na wankain we. Sapos i gat bruk na paul tingting, em bai ol plen bilong yu bai i no inap kamap long laik bilong God.

Sios em i olsem heven long graun na em inap long mekim wok bilong en wantaim wanbel, pasin bilong laikim na wok bung wantaim. Buk Song 133:1-3 "Sapos ol manmeri bilong God i sindaun gut wantaim na i stap wanbel olsem ol brata tru, em i gutpela tumas, na ol i ken i stap belgut. Dispela pasin i olsem gutpela wel bilong diwai oliv ol i bin kapsaitim long het bilong Aron, na i go daun long gras bilong wasket, na i go inap long arere bilong longpela klos bilong en. Pasin bilong wanbel i olsem wara bilong nait i pundaun long maunten Hermon na long ol maunten bilong Saion. Long dispela ples Bikpela i save mekim gut tru long ol man i stap wanbel. Em i givim ol laik bilong i stap gut oltaim oltaim."

Bihain plen bilong God yumi mas bung wantaim na go antap long hap we wara bilong Hermon long nait i pundaun long Mt. Zion. Aointing bilong God bai kapsait long yumi olsem na yumi mas redi long go bungim God.

**Paul Zuvani i raitim**

**DON Bosco Teknikol Koles i bin holim planti ol pilai long wanpela wik i go pinis long Gabutu, Pot Mosbi.**

Pater Ambrose Pereira, SDB, Spiritual Dairekta bilong Koles i tok dispela ol pilai i stat long Sande wik we i bungim ol sumatin, ol tisa na papamama wantaim.

Em i tok Sande i kamap famili de na ol i amamasim wantaim pestode bilong God i kisim Maria i go long heven.

Ol ogenaia i amamasim dispela de wantaim musik long apinun.

Skul i amamasim laip bilong Don Bosco wantaim driman bilong en long bipo taim na i traim long bihainim dispela laip long sindaun bilong Papua Niugini nau.

Bikpela samting em long stap bilong ol lain man husat i bihainim laip bilong Don Bosco long pasin ol i mekim long nau.

"Mipela olsem ol yangpela, ol tisa na ol papamama i bihainim laik na tingting bilong Don Bosco o nogat?" Pater Ambrose i askim.

"Dispela ol pilai i bin gutpela na olsem mipela tingting long kamapim wankain pilai long bihain taim," em i tok.

Fr Ambrose i tok bihainim dispela pilai skul i amamasim bon de bilong Fr Roger Miranda, SDB husat i rekta bilong skul na long apinim ol sumatin, tisa na papamama soim stail o strong ol i gat.

Laspela de long Fonde (las wik) skul i holim Baibel Kwiz.

Long dispela Don Bosco i askim Jubilee Katolik Sekendari Skul, Caritas meri Teknikol Koles na St Therese Praimeri Skul, Badili, long stap insait long kwiz.

"Mipela i hop olsem wantaim Baibel kwiz dispela bai hopim tingting na laik bilong ol sumatin long laikim Baibel na kam save long skul bilong Bikpela," Fr Ambrose i tok.

"Mipela nau i kamap long pinis bilong amamasim dispela na hop olsem olgeta i lainim sampela gutpela samting long dispela ol pilai na tok.

"Mipela i hop dispela ol pilai i bungim ol sumatin, ol tisa na papamama long wanpela spirit," em i tok.



Ol yangpela i lainim ol Baibel ves long stap insait long Baibel Kwiz. Foto: Fr Pater Ambrose Pereira, SDB.

## Don Bosco holim Baibel Kem bilong ol yangpela

**Fr Sylvester Kuli i raitim**

INAP olsem 26 yangpela man na meri long Mary Help bilong ol Kristen paris long Sabama, Pot Mosbi i bin stap long kem long Don Bosco Teknikol Skul, Gabutu long las wik. Dispela kem em Fr

Sonny Fajardo, SDB, i bin go pas long em wantaim helpim bilong ol bruda Bernard Kaiu na Sylvester Kuli we ol i holim bung stat long 12 Ogas i go inap long 14 Ogas, 2016.

Miss Aileen i go pas long bungim ol yangpela husat

i bilong wan wan ol ples olsem Sabama, Pari na Gabutu long ol i save long ol yet.

Dispela bung i mekim ol yangpela i serim tingting, save na tok bilong God na long pre wantaim olsem wanpela pipel tasol.

Bihain long dispela Fr

Sonny ,SDB, i givim tok long wei Nupela Testamen inapim tok long Old Testamen.

"Tok bilong Lectio Divina i bin gutpela tru," wanpela yangpela i tok, "long wanem dispela i hap we mi ken bung wantaim Jisas long tok bilong en."

"Em i gutpela long save long Baibel na Tok bilong God," narapela yangpela i tok.

Olgeta yangela i mekim samting long kem na i serim tok wantaim long baibel skits, baibel kwiz na ol song we ol bruda i go pas long en.

## Osiania bisop bung long Pot Mosbi

**Paul Zuvani i raitim**

EKSEKYUTIV Komiti bilong Federesen bilong Katolik Bisop Konferens bilong Osiania i stap nau long wanpela kibung long Pot Mosbi.


Sikpela bisop i makim ol ailan kantri olsem Australia, Nu Silan, Papua Niugini, Solomon Ailans, Nu Kaledonia, Vanuatu na narapela ol ailan kantri.

Ol bisop em Asbisop John Ribat ,MSC, bilong Pot

Mosbi (presiden); Bisop Robert McGuckin (deputi presiden) bilong Toowoomba, Australia; Bishop Vincent Long, OFM Conv, Bisop bilong Parramatta, Australia; Bisop Charles Drennan, bilong Palmerston Not, Nu Silan; Asbisop Michel Calvet, SM, bilong Noumea, Nu Kaledonia na Bisop John Bosco Baresmes, SM, Bisop bilong Pot Vila, Vanuatu.

Long kibung ol i toktok long planti ol samting olsem asilum (refusi) prosesing senta long Manus na Nauru, hevi bilong Klaimet senis, maining long solwara, ol toktok bilong Wes Papua na narapela moa ol toktok.

Wanpela bikpela kibung bilong federesen na asembli bilong ol 84 bisop bai kamap long Pot Mosbi long 11 i go long 16 April, 2018.





# Givim sans long ol pipel i kamap papa bilong ol gutpela haus

DISPELA wik long Palamen, planti toktok i kamap gen long wok bilong Hausing Komisn na bikpela laik bilong ol pipel long gat gutpela haus bilong ol yet. Ol askim i kamap long watpo Hausing Komisn i sasim bikpela mani tru long ol pipel i laik baim haus. Sampela pablik sevan i stap long ol haus ol i baim pinis tasol Hausing Komisn i no givim taitel long ol yet.

Dispela hevi bilong ol pipel i gat gutpela haus em i no nupela samting.

Tude populesen bilong kantri i winim mak bilong 7 milien na i go kamap klostu long 8 milien nau. I gat moa manmeri i wok long muv i go painim wok long taun na ol siti long PNG tasol planti bilong ol i no gat haus.

I gat moa manmeri i rentim ol haus o ol rum long ol taun na ol setelmen. I no gat rot bilong baim ol gutpela haus long gutpela prais. I no gat gutpela reit bilong ol benk long pipel i kisim dinau long baim haus bilong ol yet.

Na bikpela samting moa em i no gat graun insait taun long wokim moa haus.

Tude planti manmeri long siti olsem Mosbi i gat bikpela bisnis long rentim haus.

Ol i wok long investim mani long sanapim ol haus na brukim ol liklik rum we ol i rentim long ol wokman na meri long bikpela mani tru.

Long olgeta strit i gat ol kapenta i wok long sanapim ol nupela haus o i wok long stretim ol



Jada 016!

olpela haus na skruim moa rum aninit long haus o long sait bilong haus we papa bilong haus i ken rentim na kisim mani. Insait long ol setelmen tu wankain stori i kamap.

Ol papa bilong blok i sanapim haus na rentim spes long ol wokman bilong taun. Planti ol pablik sevan i slip long ol dispela kain

haus long setelmen na kam wok insait long siti.

Hausing Komisn i gat wok bilong sanapim moa haus we ol pipel i ken rentim na baim. Ol i no gat bisnis long salim nating propeti bilong gavman. I gat planti propeti bilong Hausing Komisn i bin paul bipo na ol i hatwok nau long kisim bek.

I bin gat sampela paul pasin i kamap we sampela opisa i giaman na paulim na salim ol haus na taitel bilong propeti. Tasol NHC i mekim bikpela wok tu long stretim ol dispela hevi na stopim kain pasin olsem long kamap gen.

Wanpela bikpela het tok Yunaitet Nesen (UN) i tokim wan wan kantri long mekim em long

lukim olsem i mas gat gutpela haus bilong ol pipel.

Sapos yumi laik winim dispela mak bilong UN orait yumi mas lukluk long ol rot bilong daunim prais bilong haus na givim sans long moa pipel bilong yumi long kamap papa bilong haus bilong ol yet.

PNG i no sot long ol diwai. Yumi yet i ken katim timba na tritim na redi long sanapim haus. Yumi save baim ol kain samting olsem kapa, pen na simen na nil na ol arapela material long ol ovasis kantri. I gat bikpela takis long ol dispela samting na dispela takis i apim prais bilong haus.

I gat planti ol yangpela manmeri husat i pinisim skul long ol vokesenel na teknikel skul long wok kapenta, plama, ilektrisen, welda na ol arapela tred bilong konstraksen wok.

Saspos yumi yusim ol dispela lain long sanapim ol haus bai yumi givim wok long ol na tu, bai i no gat bikpela mani tumas i go long baim ol woklain.

Dispela em sampela tingting ol saveman bilong gavman yet i bin skelim pinis na ol i luksave long gutpela bilong en na ol nogut bilong en tu.

Em i hatwok bikos planti gavman dipatmen na ol praivet kampani tu bai stap insait long en. Taim i sot nau. Bikpela populesen bilong kantri i nidim haus na i mas gat gutpela polisi na program long kirapim wok nau. Yumi em PNG ya – yumi yet inap winim dispela mak!

## Stretim hevi o sapotim gutpela pasin taim i liklik yet

OL samting we i save gro o develop i save stat liklik. Sapos dispela ol samting i gutpela o nogat na i pas long bodi (fisikel), tingting o spirit (bilip) olgeta i wankain tasol, ol i stat liklik.

Skelim tingting i givim piksa long mani plen Gavman i save makim bilong mekim ol wok.

Wanpela hap Gavman i save makim mani long mekim ol wok em long stretim ol rot.

Bihainim hamas mani kantri i gat Gavman oltaim i save yusim bikpela mani long stretim ol rot long wanwan yia.

Ol mani plen Gavman makim long Woks na Implementesen Dipatmen I soim long 2015 mani plen em givim K1.443 bilien, K1.06b long 2016 na em i ting long makim K400 milien long 2017 baset.

Long stretim ol rot em i



makim K70 milien long 2015 Baset, K45m (2016) na i ting em bai makim K50m long 2017 mani plen.

Arere long dispela em i save kisim mani tu long ol arapela hap long stretim wanwan ol rot. Long Hailans Haiwe em i kisim dinau olsem K2 bilien long Esia Developmen Benk long stretim dispela rot.

Olsem yumi ken lukim dispela em ol bikpela mani we Gavman inap yusim long kamapim ol arapela gutpela developmen projek long

bringim gutpela sindaun long ol manmeri.

Dispela em piksa tasol long soim wanem kain pen o amamas sapos wan wan manmeri i tingting gut na helpim long developim o pasim sapos em i save samting i gutpela o nogut long em.

Taim pikinini i liklik yet na i tok nogut, em wok bilong papamama long pasim em long em i no ken tok nogut.

Tasol sapos pikinini i harim tok, helpim papamama long wok, pre na amamas wantaim ol poroman bilong em, em wok bilong papamama long sapotim tingting bilong pikinini long em i go het long mekim olsem.

Long Papua Niugini i gat gutpela sosaiti ol lidaman na liklik manmeri wantaim i mas save wanem samting i gutpela na wanem samting i nogut. We i gat liklik bruk long

rot, baret, stil na bikhet pasin, em wok bilong lidaman na papamama long stretim o pasim taim dispela samting i liklik yet.

Taim dispela liklik hevi o pasin nogut i go bikpela em bai hat long stretim.

Olsem ol dokta i save tok long Inglis: "Prevention is better than cure." I gutpela long pasim ol hevi i no ken kamap bikos taim ol i kamap dispela planti taim bai hat long pasim.

Tasol sapos samting i gutpela olsem kamapim ol wok developmen o pikinini i lain long helpim famili na komyniti long gutpela wok na pasin em i gutpela long sapotim tingting na pasin bilong em.

Dispela long wanem em isi long Gavman i yusim liklik mani o long pikinini i helpim long kamapim gutpela sindaun bilong famili na komyniti long bihain taim.



Published Weekly, Thursday, for Word Publishing Company, Ltd.  
P.O. Box 1982, Boroko, NCD  
Papua New Guinea  
Telephone: (675) 325 2500  
Fax: (675) 325 2579  
Email: [editorial@wantokniuspepa.com](mailto:editorial@wantokniuspepa.com)

Pe bilong wanpela yia  
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager  
Elizabeth Konga

Editor  
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



# Namba wan PNG Fashion Wik i kamap

Frieda Sila Kana i raitim

PNG Fashion Wik em i wanpela ogenesesen we i kamap long helpim ol meri PNG husat i save wokim disain bilong ol kain kain stail klos bilong PNG stail stret.

Dispela ogenesesen i bin bungim ol disaina na ol lain husat i gat laik long mekim mani o bisnis long samapim ol kain kain klos, long Holide Inn Hotel las wik. Dairekta bilong PNG Fashion Wik em i Misis

Janet Sios bilong Hospital Poroman. Em i bin kisim wanpela bikpela disaina bilong ol klos na fashion long Sydney, Australia i kam long go pas long dispela wok-sop.

I bin gat ol meri i kam long ol provins na long Pot Mosbi na ovasis tu.

Tupela meri Manus i kam longwe tru tasol tupela i save helpim wok bilong narapela meri Manus disaina em Eva Pokawin. Asah Misi husat i marit long Rigo i

save stap long Mosbi na samapim ol klos tasol Joan Philip em i save stap long Manus. Tupela i bin stap long wanpela tripela mun samap kos long Isaac Trening Senta long Loretto Hostel Pot Mosbi long dispela taim. Ol bai pinisim skul long 30 Ogas.

Long Sarere ol i pinisim wantaim Fashion So we 8-pela bilong ol bikpela PNG disaina i soim ol wok bilong ol. Wan wan bilong ol i bin soim 16 prodak bilong

wok bilong ol long dispela so we ol model bilong PNG yet i bin werim ol na soim long ol bisnis lain husat bai inap long baim na salim.

Dispela so em i narapela kain tru bikos em i no bilong Fashion bilong ol kalsa so bilong tumbuna kalsa tu we ol atis bilong PNG tu i bin kamap na soim ol kain kain tumbuna disain bilong ol long penting. Ol model em ol yangpela meri na mangi bilong asples PNG yet.



Tupela meri Manus i kam longwe tru tasol tupela i save helpim wok bilong narapela meri Manus disaina em Eva Pokawin. L-R Asah Misi husat i stap long Pot Mosbi na Joan Philip i kam long Manus yet. Poto: Frieda Sila Kana



Ol meri i soim ol kain kain klos bilong ol disaina bilong PNG Fashion Wik long namba wan ranwe bilong PNG yet insait long Stanley Hotel long Pot Mosbi.

Poto: Nicky Bernard.



Ol grup i sanap bihain long 1 wik woksop long Holide Inn Hotel. L-R Norma Avosa (Eksektiv Komiti memba), Florence Jaukae Kamel (Bilum disaina), Dona Nagul (Eksektiv Komiti), Kini Caucau (Eksektiv Komiti), Theresa Chalau (Fran), Eksektiv Opisa Hospital Poroman, Urusula Gorea, (Eksektiv Opisa) PNG Fashion Wik. Poto: Frieda Sila Kana.



# Purel ples strongim kalsa na turisem

## Yangoru-Saussia distrik



Boim-Sara Kalsa Prisevesen Senta.



Boim-Sara Tumbuna singsing grup.



Maru na Dipatmen Seketeri bilong en, John Andrias i go wantaim ol singsing grup bilong Boim-Sara viles.



Ol meri singsing grup bilong Boim-Sara viles. Ol poto: Opis bilong DTCl

**OL pipel bilong Boim-Sara ples insait long Yangoru-Saussia Distrik bilong Is Speik Provins i kirapim wanpela kalsa projek haus bilong holim strong ol pasin kalsa.**

Dispela haus em i wanpela "Haus Tambaran" we ol i kirapim olsem wanpela Kalsa Senta long holim bek na strongim ol kalsa bilong ol pipel bilong Boim-Sara na bilong olgeta hap bilong Distrik.

Lokal Memba bilong Yangoru-Saussia Distrik na Minista bilong Tred na Komes na Indastri, Richard Maru i bin kisim wanpela deligesen i go long Boim-Sara ples long lukim haus tambaran long wiken antap.

Minista Maru i tok tenkyu long ol lain long ples i yusim tingting bilong ol yet long wokim wanpela hap bilong holim kalsa bilong ol.

Em i tok em bai sapotim dispela projek bikos ol ples pipel bilong Boim-Sara i bihainim stretpela rot.

"Kalsa bilong PNG em i wok long lus hariap bikos long ol kain hevi olsem ol yut i save dring ol stim o hombru, kisim spak brus we i wok long bagarapim laip bilong ol. Papua Niugini i gat planti gutpela samting long givim long turisem. Yumi gat ol enimal na bus i stap, ol naispela klin wara, tasol yumi no inap long pulim ai bilong ol turis i kam wankain olsem long Fiji," Mista Maru i tok.

"Olgeta yia, PNG i save lukim olsem 300,000 o 400,000 turis i kam tasol long wankain taim, Fiji we em i liklik kantri moa long PNG em i save kisim olsem 1.5 milien turis. Wanpela as em bikos PNG i no gat ol samting we bai pulim ol turis i kam long kantri," Minista Maru i tok.

"PNG i no wok long mekim wok painimaut gut long ol turis infrastraksa na ol projek, maski yumi gat planti samting i stap," em i tok.

"Mi gat bikpela tingting olsem Is Sepik Provins em i gat bikpela samting long givim long turisem sekta we yumi no go insait long en yet. Hevi bilong yumi em i stap long lidasip insait long dispela provins inap planti yia i kam, wantaim Masta Plen bi-

long turisem prodak we bai yumi kamapim long pulim ol turis i kam. Long Wewak yumi gat naispela Meni nambis we ol turis i no lukim yet. Em bikos i no gat visen na i no gat gutpela lida long bipo," Mista Maru i tok.

Em i tok Is Sepik Provins i gat samting long soim long turisem tasol em i stap long han bilong ol lida bilong provins. Sapos ol i no kirap hariap bai kantri bai go het na yumi Sepik bai stap bihain yet.

"Bihain long wokim ol rot, bris na bringim ol sevis olsem edukesen na helt i go insait long distrik, mipela bai kamapim wanpela Turisem Masta Plen long promotim ol kain prodak olsem Haus Tambaran projek long Boim-Sara viles. Yumi ken i gat planti projek tasol sapos Lo na Oda i no gutpela long ples, bai i no gat turis i kam lukluk raun long distrik," em i tok.

Minista Maru i tokim ol pipel bilong Boim-Sara olsem Gavman bai sapotim projek wantaim mani sapos i no gat hevi bilong lo na oda.

Em i tok strong olsem ol pipel i mas sanap wantaim na sapotim dispela projek long daunim hevi bilong lo na oda insait long ol ples na distrik.

Minista i tokaut tu olsem i gat wanpela sambisen pepa bilong Boim-Sara Kalsa Pri-sevesen projek we i go pinis long kisim tok orait bilong Nesenel Eksketiv Kaunsil (NEC).

Em i tok bihain long taim NEC i tok orait long sabmisen, wanpela Supa Haiwe long mani mak bilong K300 000 bai kamap long Boim-Sara ples we ol turis i ken go long Kalsa prisevesen projek em Haus Tambaran.

Long wankain taim, Dairekta bilong Ats na Kalsa Divisen insait long Opis bilong Turisem, Ats na Kalsa, Robert Ketsin i mekim wankain toktok na tok tenkyu long ol pipel bilong Boim-Sara viles long tingting bilong ol long kirapim dispela kain projek.

Em i tok olsem bihain long dispela wokabout, em bai toktok wantaim ol rait lain ejensi we i save wok wantaim Ats, Kalsa na Turisem long helpim dispela projek long go het.




Toro



Biabia



Kanage



Autim Tingting

PNG em i wanpela developing kantri na PNG i no olsem ovasis. Planti hap long provins nogat gutpela haus, pawa lait na kar bilong ol yet long eria ol i stap long em. Tingting mi gat i olsem; Enrolim ol drop aut long UNITECH na UPNG wokim planti skul na eduketim ol yangpela Papua Niugini lain manmeri long developim PNG. tenkyu.

Mr. Robert (rbt) Kubong Goroka

Gavman bilong yumi i save givim mani long spot na edukesen long kantri. Gavman i save givim bikpela ol milien kina long dispela tupela eria na tu i save mekim ol planti gutpela senis tu i kamap long ol taun na siti. Tasol ol lain long ol longwe ples o rurel eria em ol i no lukim sampela gutpela senis i kamap long ol yet! Ol ples olsem Kaintiba, Jimi, Is na Wes Kambia, Minyama na i gat planti moa we ol i kra i tru long sevis na stap. Sailen kra i bilong ol nogat man i harim. Mi gat bikpela tingting olsem sapos gavman i luksave long ol dispela kain ples, kantri bai kisim blesing bilong developmen.

Tenkyu. Elisha Nama W.H.P

Dia Edita, Mi laik toktok long ol polisman na meri bilong dispela kantri. Yupela ol polis manmeri yupela mas yusim dispela tingting God I givim yupela.

Teks i kam long: **71845906** na autim tingting...




Soim Kala long pen

OL atis bilong PNG I wok long kamap planti nau na wei bilong ol long penim ol piksa i wok long senis planti. Ol piksa ol save penim i save gat stori bilong em na taim ol penim ol piksa ol save mekim gut tru na ol save tingting planti long kamap piksa wantaim stori bilong ol long het. Dispela ol atis bilong yumi save stadi long ol kala bilong pen ol bai putim long piksa bilong ol na taim ol pinis kala bilong piksa bilong ol save kam gut tru. Long Sarere sampela bilong ol atis bin go long bung bilong ol Fesen long Stanely Hotel long Pot Mosbi na soim ol kala bilong long pen piksa. Dispela ol piksa ol penim ol givim go long lain husat i lukautim fesen long salim na mekim mani bilong ol.

Poto na stori: Nicky Bernard



# Em nau! Ol pikinini i ken painim rot i go long ples wantaim Wantok lain...



# PAINIM WOD PILAI

Ol wod lista:

**HETMAN**  
**OLTAIM**  
**PULIMAP**  
**TUMBUAN**  
**YAUPAS**  
**SINGAUTIM**  
**PEKPEK**

**KONDA**  
**AVINUN**  
**BUNIM**  
**KARAWA**  
**DESEMBA**  
**HOLIM**  
**MEKNOIS**

**PASTAIM**  
**SPAIDA**  
**WELMAN**  
**TANGET**  
**POISIN**  
**MATMAT**  
**SIP**

Y K T T D C U A S E B S F I W F C S B A F F W K L  
D J T V C O Z L L S U E P G U I Z Y E O D X G W V  
I E L S M A D M K A N M A O S D Y H N E A O C S D  
X Q M I I A R I I N I L U U D Y A R Z S V K S H Z  
R Y H O O O C H L A M N Q I B N R S D T S E R E Q  
T E F E L N T O T L I S T S D L O T N F O L T F D  
P L K S A A P L A U T M E I S R S D V Y K I E M M  
R U E M M V O I R K B O H S S Z P S I P T E L R A  
P A T T S V I M U M Z F I Y E B R Q G I G C C D N  
H E A F I A S N R K O Q H N A E E O C R O I I M C  
H M E K N O I S U O Y T B E E W H C E T G F E L U  
I T M A G O N F T N F K S W E E D H T M T R F G H  
X P T A A D F F D D S P A I D A W R G O J L J W C  
E F U T U E E X I A S R P L T E F R T M A R N G E  
Y T M L T S C E E H A K A R A W A D J T E E N E T  
A A B D I E P K P E K P E K N N P N O E I D I N G  
S X U N M M P A S T A I M E G N G A R T K M J I Z  
X T A P A B A F S R Z L A W E L M A N R G T O Y K  
C Q N I A A G P A H S W E M T I F S E M D J Y O W  
Z M A E M S E K K I U D Z R D R I X S N I V N T G

## STORI BILONG TUMBUNA

### Pik karim man

**B**ipo tru i no gat man long Enga Distrik. Tasol long Laiagam sab distrik (Enga) i gat wanpela tarangau (Kamp) i stap.

Em i gat wanpela bikpela pik mama bilong em stret. Tarangau (Kamp) i save slip long hul bilong wanpela bikpela diwai. Pik mama bilong Tarangau i save slip klostu long as bilong dispela bikpela diwai. Wanpela taim pik mama bilong tarangau i lus na tarangau i wok long painim hia i go nap 3-pela de olgeta. Na em i painim pik bilong em i go klostu na em i harim sampela liklik pik i krai insait long bus. Na em i lukim wanpela bikpela ston. Aninit long ston em i lukim bikpela pik mama bilong em i slip na wok long givim susu long ol pikinini pik.

Tarangau i go klostu tru na sanap kaunim ol pikinini pik na em i lukim wanpela man tu i dring susu wantaim ol pikinini pik. Na tarangau i amamas tru na i kisim pikinini man hia i go aninit long wing bilong em. Na em i pasim pik mama long rop na ol liklik pik em i pulimapim long bilum bilong em na bringim ol i go long haus bilong em.

Tarangau ya i pasim pik mama long as bilong bikpela diwai na ol liklik pik em i larim wantaim mama. Na em i karim pikinini man i go antap long hul bilong diwai, tarangau i save slip long en. Em i putim pikinini insait long hul bilong diwai na em i kilim wan wan pikinini pik na givim long pikinini man. Na tarangau yet i kilim kain kain kapul tu na givim mit bilong kapul long pikinini long kaikai.

Na pikinini man hia i gro i go bikpela boi pinis. Klostu em i winim 12 o 13 yia pinis. Nau tarangau i holim boi hia long tupela han bilong em na bringim em i go daun long graun. Tarangau i givim nem Tanjen long em na wok long soim em we na pasin tru bilong wokim haus, gaden, banara, na bilas olkain samting bilong lukautim pik tu long em. Na klostu olsem Tanjen i winim 20 o 21 yia olsem pinis na em i gat planti pik na gaden tru. Em i save slip long haus man bilong em. Olgeta moning long 4 o 5 klilok em i save slip long bet bilong em na i save pilaim susap bilong em. Long wanpela nait em i

slip long haus man bilong em. Tarangau i go long sampela hap long nait tru na i opim dua long wanpela haus meri na em i lukim wanpela naispela yangpela meri i slip i stap long bet bilong em.

Tarangau i putim tupela han bilong em i go aninit long bet bilong yangpela meri ya i slip long en na karim meri i go na putim insait long haus bilong Tanjen na em i pasim dua na i go pinis. Tanjen i no harim o pilim nois tu em i slip pinis. Meri tu em i no lukim o harim tu tarangau. Em i slip tru. Klostu tulait na Tanjen i kisim susap bilong em na em i kirap pilaim. Yangpela meri em i kirap tok, klostu tulait na mi laik slip, yu wanem long-long man i kam long haus bilong mi na paitim susap olsem.

Tanjen i kirap nogut na guria tru na em i pret. Em i no save em i husat i kam slip long haus bilong em na wok long krosim em. Bihain Tanjen i kirap na askim em: Yu husat? Yu kam olsem wanem na kam slip long haus bilong mi na yu krosim mi olsem? Em i no haus bilong yu. Nau tupela i pait long toktok i go i go inap tulait. Tanjen i tok; yu kirap i go ausait. Na naispela yangpela meri hia i go ausait na lukluk. Tru, em i no haus o ples bilong em. Olsem na em i pret tru na sindaun klostu long arere bilong haus. Na Tanjen i tok bai mi kilim wanpela pik na givim yu bai yu ken karim i go long ples bilong yu.

Nau tru Tanjen i redim kumu samting pinis na kilim wanpela bikpela pik na mumuim pinis, em i givim long yangpela meri na tokim em, yu karim i go. Meri hia i karim pik i go. Tasol i no gat rot tru. Bikpela ston i banisim em pinis na i no gat rot long go long ples bilong em olsem na em i kam bek long haus bilong Tanjen gen. Olgeta de Tanjen i kilim pik na tokim meri long karim i go long ples bilong em, tasol ston i pasim rot na em i kam bek. Bihain Tanjen i maritim dispela yangpela meri na tupela i karim planti pikinini moa olsem na man i kamap long Enga. Mipela i gat wanpela bikpela tok ples Enga i winim arapela tok ples long PNG. Planti pipel tru. Mining bilong Tanjen i olsem blut bilong pik i mekim kamap man long Enga.

Ansa bilong Wod Pilai isu 2188

ONEAIAPIETETECGSCAVNHCWNRRCR  
TNIRBGLAJMNSQSJSXSFQXKAIB  
QGHJEWKFDLURAAABOBIVTITBKM  
PDFEIGRAUNNEJRPVNWMGHAIFS  
SOEXDESYRLIRNEASTIMBUMTSMAL  
LIOTTFCSDNDPAPTICINCAMTILG  
INLMNTNHTETEBNTPSPLAUEAE  
FUDEEDSEVOOOFSTIQUUMIIEETI  
ISLMIVDAAPMPBAMADSBRRIAS  
RKOIBNCUIIDVSSMCNTMIQEBTD  
SKNOCNPRQEQRSKTEEIECIOLAJ  
DBGTAPENOBOTIXPGRBOIRPMP  
SGSKIIEIEOAEBNPHEPITKIRAPT  
NIIAQLJYFNERRAVFQREKNPILLN  
EOABVHJTNGOUTOAMDDIASAAG  
RHBDDJWNXMLOMIYBNUFMGUESNE  
GLSASLAERXPINSAITINGTINGL  
ESOKCXSB OFSMGHINTISOHDQUS  
DCEHAPFAULDNIIMILLTHASFRA  
TLYSIHRGSPFOKALAPAEJWSOGR





# Ol MSG kantri i mas strongim ol reip na vailens lo

Caroline Tiriman i raitim

Lida bilong Wimen egens kraim na ko-rapsen long Vanuatu i tok Vanuatu na olgeta Melanesian kantri i mas kamapim ol strongpela lo long karamapim ol pasin bilong reip na vailens.

Jenny Li go i mekim dispela toktok bihain long wanpela man i bin ripim wanpela meri

bilong narapela kantri long Santo long stat bilong dispela mun.

Ol ripot i kam long Vanuatu i tok olsem polis i arestim pinis dispela man na em bai kamap long kot klostu taim.

Jenny Li go i tok tu olsem toktok bilong en i bihainim tu ripot bilong UN we i soim pasin bilong reip na vailens egensim ol meri long ol MSG kantri i wok long go antap.

## PNG nupela ileksen fi i no stret

Caroline Tiriman i raitim

Wanpela meri komyunitii lida na bipo lida bilong Greens pati long Papua Niugini i askim olgeta meri, ol yut, ol sivel sosaiti grup long no ken vot long 2017 Nesenel Ilekse.

Dorothy Tekwie i mekim dispela toktok bihain long Praim Minista Peter O'Neill i bin tokaut long wik i go pinis olsem olgeta kenidet bai mas baim 10 tausen kina (K10,000) nominesen fi.

Mak bilong mani em ol kenidet i save baim bipo long resis long ileksen em 2 tausen kina (K2,000).

Misis Tekwie i tok tu



Haus Palaman bilong PNG.

olsem ol bai lukluk nau long kotim ilektorel komisn long wanem em i tok aninit long mama lo bilong kantri, olgeta pipel i gat rait long sanap long ileksen.

Em i tokim Radio Australia olsem em i wari tru long wanem no gat wanpela man nating long PNG o meri i gat dispela kain mani long sanap long ileksen.

## Tupela refuji i bin spak wantaim ol spakman-Manus MP i tok

Sam Seke i raitim

Memba bilong Manus Open long Papua Niugini Palamen, Ronny Knight i tok ol tokwin olsem tupela refuji we sampela man Manus i bin paitim sampela wik i go tupela i bin spak long hom bru.

Mista Knight i tok tupela man i bin dringim hom bru wantaim ol boi long ples tasol tu-

pela i no laik baim dring bilong tupela na pait i bin kamap.

Em i tok mekim hom bru em i egensim lo, dringim hom bru long pablik i brukim lo tu olsem na olgeta wantaim long tupela sait i rong.

Mista Knight i tok media bilong Australia i no bin stret long sutim tok tasol long ol mangi Manus - long wanem tupela refuji bilong Afghanistan tu i rong.

## Ronald Talasasa i tok Rio Olimpik i seif tru

Sam Seke i raitim

Chef de Mission bilong tim bilong Solomon Ailan long Rio Olimpik Gems long Brazil i tok, ol lain bilong en i amamas tru long sait long sekyuriti long Gems Viles.

Ronald Talasasa i tok ol i bin go raun tu long planti hap insait long Rio de Janero Sity na ol i no gat hevi wantaim sekyuriti.

Maski planti toktok i bin kamap long ol wari long sekyuriti, em i tok ol i pilim seif long wanem i gat planti lain militeri na polis i stap lukautim sefti bilong ol.



Ronald Talasasa (long namel) long Rio. (The Reporters' Academy foto)

Mista Talasasa husat i bin lukautim tu Tim Solomon Ailan long 2004 Athens na 2012 London Olimpik i tok, i

luk olsem Rio bai em bes sama Olimpik sapos i no gat wanpela bikpela hevi i kamap inap em i pinis.

## Bogenvil Presiden i laik miting wantaim PNG Gavman

Caroline Tiriman i raitim

Dispela askim i bihainim tingting bilong gavman long givim ol Rio Tinto sea i go long Me'ekamui lain wan pisin.

Presiden bilong Bogenvil nau i askim Praim Minista Peter O'Neill long holim kwik wanpela miting bihainim tingting bilong nesenel gavman long givim ol sea bilong Panguna Kopa main i go long wanpela liklik lain papa graun.

John Momis i tok em i no wanbel stret wantaim dispela tingting bilong Mista O'Neill long wanem em i tok dispela bai inap kirapim



John Momis Presiden bilong Bogenvil na PNG Praim Minista Peter O'Neill.

narapela bikpela trabel long Bogenvil.

Mista O'Neill i bin tokim Palamen long wik i go pinis olsem ol sea em papa bilong Bogenvil Kopa mine Rio Tinto i bin givim gavman, bai go nau long lain bilong em ol

i kolim long Me'ekamui Government of Unity.

Rio Tinto i bin papa long Panguna Gol na Kopa maie em i bin pas pinis bihainim bikpela pait na trabel long ol 1990's em planti tausen pipel i bin dai long en.

## Solomon Ailan i laikim US sprinta Justin Gatlin i raun long kantri

Sam Seke i raitim

Chef de Mission bilong Tim Solomon Ailan long Rio Olimpik, Ronald Talasasa i tok em i laik askim US sprinta Justin Gatlin long go helpim ol etlit bilong kantri.

Ronald Talasasa husat i Vais Presiden bilong Intenesenel Nesenel Olimpik Komiti bilong Solomon Ailan i tok em i bin askim Gatlin long Rio las wik.

Gatlin em i bin winim silva medal long Rio long 100 mita sprint bihain long Usain Bolt.

Tasol nem bilong Gatlin em i no bin stap gut tumas bihain long 2001 taim em i kisim tupela yia banis long etletiks bikos em i bin tes positiv long kisim drag, tasol bihain ol i bin katim i go daun long wanpela yia tasol.

Long yia 2006, ol i bin givim em 4-yia ban long em i tes positiv long drag, na ol i bin rausim 9.77 wol rekot bilong em long dispela taim long 100 mita ran.

Hia em sampela toktok bilong Mista Talasasa i kam long Rio de Janero long las Fraide.

## Wok bilong TCA long lukautim Torricelli Mountain Ranges i go het moa

Caroline Tiriman i raitim

Ol wok bilong Papua Niugini Tenkile Conservation Alliance long lukautim ol abus, diwai na olgeta samting insait long Torricelli Mountain Ranges klostu long Lumi long Sandaun provins i wok long go het gen.

Dispela wok bai stap tu insait long wanpela piksa o muvi stori we wanpela mansave bilong mekim ol muvi i mekim long pinisim piksa na stori bilong Jim na Jean Thomas, husat i bin statim dispela wok.

Bikpela wok bilong Tenkile Conservation Alliance em bilong lukautim ol tri kangaroo o Tenkile na ol Waimeng long ol bikbus bilong Torricelli Mountain Ranges.

Tupela i bin go long Lumi moa long tepela yia i go pinis long traimev ol dispela tri kangaroo long wanem namba bilong ol klostu i pinis olgeta.

Ol i wokbung wantaim ol asples pipel long lukautim ol dispela tri kangaroo na ol i tok ol i amamas long dispela wok bilong ol.

Man husat i mekim dispela piksa em Mark Hanlin bilong Australia.

## Momis i tok O'Neill i subim nus long Bogenvil politik

Caroline Tiriman i raitim

Presiden bilong Atonomas Bogenvil Gavman John Momis i sutim tok long PNG Praim Minista Peter O'Neill long subim nus bilong en i go long ol wok bilong Bogenvil Gavman na lokal politik.

Mista Momis i mekim dispela toktok bihain long Mista O'Neill i bin tokaut olsem em bai givim ol sea em Rio Tinto i bin givim gavman i go long liklik lain papagraun em ol

i kolim Me'ekamui Gavman ov Yuniti.

Rio Tinto i bin papa long Panguna Gol na Kopa main em i bin pas pinis bihainim bikpela pait na trabel we i bin stat long 1988 em planti tausen pipel i bin dai long en.

Mista Momis i tok olsem em i no wanbel stret long dispela tingting bilong Praim Minista O'Neill long wanem em i tok dispela tingting i no bihainim ol toktok bilong Bogenvil Pis agrimen.



## Meya bilong London i laik Labour i rausim Jeremy Corbyn

MEYA bilong London, Sadiq Khan i singaut long ol oposisen memba Labour Pati bilong Briten, long rausim Jeremy Corbyn. Em i tok Corbyn i no bin kisim inap sapot long larim Briten i stap wantaim EU olsem na bai em i no inap kisim sapot bilong ol vota.

Sadiq Khan em i wanpela strongpela memba bilong Labour Pati. Em i bin winim wanpela salensa bilong Conservative Pati bilong gavman na i kamap namba wan Muslim meya bilong London long begin bilong dispela yia.

Toktok bilong Khan i soim ples klia olsem em i sapotim MP Owen Smith. Owen Smith i wok long salensim Corbyn nau long kamap lida bilong Labour Pati. Em i tok Corbyn i no inap long go pas long pati na winim jeneral ileksen long 2020.

"Jeremy i soim olsem em i

no inap long ogenaisim wanpela strongpela tim na ol pipel bilong Briten i no gat bilip na rispek long em," Mista Khan i bin tok long wanpela stori em i bin raitim long Observer niuspepa.

Briten i bin vot long Jun 23 vote long lusim Yuropien Union (EU) European na dispela i kamapim bikpela gurua long politiks bilong kantri. Labour na oposisen UK Independence Pati i paul nabaut, na i soim ples klia olsem i gat bikpela hevi namel long ol memba long gavman bilong Conservative Pati.

Mista Corbyn, husat i wanpela lef-wing memba bilong Palamen, i bin kisim planti toktok i egensim em bikos em i feil long kirapim tingting bilong plant i tausen Labour sapota long vot long stap wantaim EU. Na bihain tasol long dispela ileksen, em i bin singaut long ol wok i mas kamap hariap long



Sadiq Khan i singaut long Labour i mas senisim lida.

Briten i mas bruk lusim EU.

"Mi save long ileksen bilong mi we i bin gat planti salens tru long ol lain Tory. Tasol sapos yumi strong na bilip long wanem samting yumi kempen long en, bai ol pablik i luksave na sapotim yu," Mista Khan i tok.

"Jeremy i feil long dispela tes bilong EU referendam. Bai em i mekim wanem kain senis long taim bilong jeneral ileksen?" Mista Kahn i askim.

## Presiden Rodrigo Duterte i givim tok lukaut UN

PRESIDEN bilong Filipins Rodrigo Duterte i givim strongpela tok lukaut i go long Yunaitet Nesens (UN) bihain long UN i tokim em long stopim pasin bilong kilim ol drag saspek. Em i tok bai em i lusim UN na askim Saina na ol arapela kantri long kamapim wanpela nupela grup.

Tupela UN saveman bilong human raits i askim gavman bilong Duterter long stopim ol polis i wok long kilim ol man bihain long Duterte i winim ileksen long promis bilong pinisim pasin bilong baim na salim ol drag.

Ol ripot i tok long taim Duterte i winim ileksen long Me 9, ol polis i kilim pinis 900 pipe husat i save salim na baim drag.

Tasol Mista Duterte i tok gavman bilong em i no mekim ol dispela pasin. Em i tokim ol ripota long ples bilong em long Davao olsem ol polis i no kilim ol dispela



Presiden bilong Filipins Rodrigo Duterte.

lain na em i tokim ol UN saveman long go painimaut ol yet.

"Bai mi soim wol olsem yupela em ol stupid saveman," em i tok. Em i tokim ol long no ken lukluk long ol lain i dai tasol ol i mas lukluk tu long ol laip drag i save bagarapim na kilim.

Em i mekim dispela strongpela toktok egensim UN na ol

memba bilong en. Em i sutim tok long UN i no inap long mekim wok bilong en tasol i 'wari long bun bilong ol kriminal i wok long hip i go antap."

"Mi no laik tok bilas long yu, tasol ating bai mipela i lusim Yunaitet Nesens," em i tok.

"Watpo yu wok long harim dispela stupid?"

## Donald Trump i senisim tingting long imigresen polisi

US Ripabliken presiden kendidet Donald Trump i wok long senisim ol toktok bilong em long imigresen polisi. Pastaim em i bin toktok strong tru olsem bai em i rausim ol 11milien pipel husat i no gat tok orait long stap long USA.

Em i tok tu olsem bai em i sanapim wanpela banis long boda bilong USA na Meksiko long stopim ol lain i save hait na kam insait long kantri. Tasol planti lain i tok em i no inap long winim dispela mak.

Mista Trump i stap baksait tru long Hilary Clinton, kendidet bilong ol Demokratik Pati long resis long kamap Presien bilong USA. Ilekse bai kamap long Novemba 8.

Ol savelain i tok Mista Trump i senisim tingting nau bikos em i laik ol blakskin na ol Hispanik lain i givim vot long en. I kam inao nau, ol sapota bilong Trump em ol waitskin wokmanmeri.

Em i gat nupela kempen menesa bilong em Kellyanne Conway. Ms Conway i tokim CNN nius olsem Mista Trump bai lukluk long pasin bilong helpim ol dispela lain husat i no gat tok orait long stap long USA.

"Em i laik yumi bihainim lo. Mipela i rispektim ol pipel bilong Amerika husat i painim gutpela wok na yumi bai mekim gutpela pasin long ol lain husat i stap long kantri bilong yumi." Ms Conway i tok.

# Suisaid boma long Turkey em manki i gat 12-pela krismas

PRESIDEN Recep Tayyip Erdogan bilong Turkey i tokaut olsem wanpela manki krismas bilong em inap long 12-pela yia i bin pairapim bom long Sarere na kilim em yet wantaim 51 pipel long wanpela marit pati. Presiden Erdogan i sutim tok long ol lain Islamik Stet (IS) long kamapim dispela birua. Planti bilong ol lain husat i dai na kisim bagarap em ol lain Kurdish.

Dispela bom i pairap long ples Gaziantep klostu long boda wantaim Syria. Samting olsem 69 pipel i bin kisim bagarap long dispela birua.

Ol ripot i kam long gavman bilong Turkey i tok wanpela yangpela manki krismas bilong em namel long 12 na 14 yia i bin pairapim dispela bom o "sampela lain" i bin pairapim. Presiden Erdgan i strong tru olsem o lain IS i bin kamapim dispela birua.

Dispela birua i lukim planti pipel tru i dai long dispela yia. I bin gat planti bikpela birua i bin kamap long Turkey long dispela yia. Ol i sutim tok long ol lain Kurdish na ol IS long sampela bilong ol dispela hevi. Long Julai 15, sampela lain soldia i kamapim bikpela hevi tru long kantri long taim ol i traim long tekova long gavman bilong Presiden Erdogan.

I kam inap nau, i no gat wanpela grup i tokaut sapos ol i kamapim dispela birua. Ripot i kam long CNN-Turk i tok ol i bin painim siot dispela suisaid boma i bin haitim bom long en.

Gulser Ates, wanpela bilong ol dispela lain husat i bin kisim bagarap i tokim ol nius lain olsem dispela birua i kamap long taim marit pati i pinis long dispela eria we planti ol lain Kurdish i save stap.

"Ol i bagarapim bikpela de bilong tupela marit ya," em i tok.

Tupela nupela marit ya, Besna na Nurettin Akdogan i no kisim bikpela bagarap tumas, tasol ol i bin kisim tupela i go long haus sik.

Gavman nius ejensi Anadolu i tok long taim nupela marit meri i lusim haus sik em i tok, 'Ol i mekim marit bilong mipela i kamap



Ol famili i bung na krai long lain bom i kilim ol.

olsem ples bilong kilim man." Em i tok, "Sem bilong yu, Erdogan."

Planti ol famili i bin planim bodi bilong ol lain i dai long Sande na ol ripot i tok planti i karamapim kofin long plak bilong Kurdistan.

Long taim planti manmeri i wet long tok gutbai long ol lain i dai, sampela i sutim tok long gavman i no traim long stopim dispela kain birua. Sampela i singaut, "Sem bilong yu, Erdogan." Sampea i tromoi o botol wara long ol polis husat i bin sambai tasol na lukluk.

Presiden Erdogan i tok as bilong dispela birua long Gaziantep em long kamapim bel-hevi namel long ol grup olsem ol Arab, Kurd na Turkmen, na kamapim birua namel long ol dispela grup na ol kain kain lotu long kantri.

Ol lain jihad i lukim ol Kurd olsem namba wan birua bilong ol bikos ol Kurdish militia i go pas long pait egensim ol IS militen long Syria.

Planti ol wol lida i bin mekim strongpela toktok egensim ol lain husat i bin kamapim dispela birua. Na ol i tokaut olsem ol i sanap strong na sapotim pren bilong ol Turkey. Turkey em i wanpela memba bilong NATO.

## Human raits ripot i sutim tok long ol polis bilong Meksiko

PLANTI samting insait long wanpela ofisal ripot bilong ol polis bilong Meksiko i soim olsem ol i haitim tok bihain long ol i kilim indai ol memba bilong wanpela geng. Dispela nupela ripot i toktok long wanem samting i bin kamap las yia long taim ol polis i bin kilim 22 memba bilong wanpela geng, kukim bodi bilong ol, bagarapim ples we ol i kilim ol, na pretim ol arapela witnes husat i no bin dai.

Long mun Me long 2015, wanpela meri i go ripot long wanpela polis stesin long Guadalajara olsem 50 man i kamap long propeti bilong em na tok ol i laik baim dispela propeti.

Ol dispela man i memba bilong wanpela geng ol i kolim Jalisco Nu Jeneresen (JNG). Long 2014, ol i bin go tu long dispela propeti, Rancho Del Sol na traim long kisim oil long ol paip i ran aninit long dispela propeti.

Man bilong dispela meri i bin lus bihain long sampela lain i bin holim kalabusim em long 2012. Em i bin go askim ol polis long hepim em na rausim ol dispela lain long propeti bilong em.

Long moning, ol polis wantaim Black Hawk helikopta i banisim dispela haus na 42 geng memba i bin dai – tasol wanpela ripot Nesanel Human Raits Komisin (CNDH) bi-



Ol polis i putim tep raunim dispela propeti.

long Meksiko i bin putim aut las wik, i tok ol polis i bin kilim indai 22 bilong ol long dispela man.

Ripot bilong CNDH long dispela eksen bilong ol polis i soim ol pasin nogut ol polis i save mekim long taim ol i pait egensim ol drag geng. Planti taim ol i kilim nating ol man na bihain ol i traim long haitim asua bilong ol.

Wanpela polisman tasol i bin dai long dispela pait. Ol dispela geng memba i bin slip long taim ol polis i banisim haus na kilim ol.

Long taim Presiden Enrique Pena Nieto i kisim wok long 2012 em i bin promis long pinisim pasin bilong kilim nating ol man na stopim vailens.



# Digicel sapatim namba 60 Goroka So



(L-R): Jeneral Menesa bilong Digicel – Konsiuma Seils (Goroka), Peter Chromiec na Goroka Seils Eria Menesa, Veronica Moro i givim K20, 000 sek i go long Goroka So siameri Keryn Hargreaves.

Digicel i salim bikpela tok amamas i go long ol manmeri bilong Goroka na ol ogenaising komiti taim ol i laik selebretim namba 60 Goroka So long Septemba long dispela yia.

Digicel i sapatim dispela bikpela so we wol i save long en, wantaim K20, 000 sponasip.

Mobail Menesing Dairekta bilong Digicel PNG, Shivan Bhargava, i tok dispela so em i wanpela namba wan so insait long kantri we ol manmeri PNG na ol turis bilong ovasis i mas kam na lukim.

“Dispela Goroka So em i wanpela stail so na ol manmeri i no ken abrusim sans long lukim kain kain pasin tumbuna na kalsa bilong ol manmeri husat i save stap long Hailans.

“I gat wan wan ples tasol insait long dispela graun we yu ken lukim planti tausen manmeri bilong pait i penim pes bilong ol na redi long pait, wantaim danis, singsing na ol tumbuna pasin.

“Digicel i amamas long sapatim ol ogenaising komiti bilong dispela so na long mekim dispela so i kamap bikpela moa,” Mista Bhargava i tok.

Moa long 60 yia i go pinis, ol Patrol

Opisa bilong Australia i bin statim Goroka So long larim ol manmeri Goroka, husat i save stap nabaut long maunten na bus, i kam bung wantaim, lus tingting long pasin birua bilong ol, na i kam bung na soim kala na kalsa bilong ol long wanpela wiken tasol long olgeta yia.

Dispela liklik bung bilong Goroka i kamap bikpela samting taim yia i wok long go na em i kamap biknem Goroka So we planti tausen manmeri na turis bilong PNG na ovasis wantaim i save kam lukim long olgeta yia.

“Ol manmeri bilong Goroka na hailans i mas amamas long dispela bikpela bung we em i kamap olsem wanpela stail bung we ol pikinini long bihain taim tu bai promotim yet,” Mista Bhargava i tok.

“Goroka So i wok long helpim ol manmeri long Hailans long holim strong pasin tumbuna na kalsa bilong ol na maski pasin bilong wait man i kam insait, dispela so bai promotim ol manmeri Goroka na Hailans long holim strong pasin kastom na we bilong ol.”

Siameri bilong Goroka So, Keryn Hargreaves, i makim maus bilong ol oge-

naising komiti na tok welkam long sponasip bilong Digicel.

“Mi laik tok tenkyu long Digicel long helpim ol i givim mipela wantaim K20,000 sponasip,” em i tok.

“Mipela i laik strongim dispela patnasip wantaim Digicel i go moa long ol bihain taim long gutpela bilong dispela so.”

Dispela yia, namba 60 Goroka So bai kamap long Septemba 16 – 18.

Goroka taun em i kepatil bilong Isten Hailans Provins na i gat populesen olsem 25,000 manmeri.

Planti ol wait manmeri long bipo taim i bin kam pas long Goroka na Isten Hailans bikos maining na kopi plantesen i bin kamap long hap long taim yet.

Goroka i kamap wanpela stail ples insait long Hailans rijon we moa turis i save kam raun na namba bilong ol turis i kam long Goroka i winim namba bilong arapela ol turis i save kam long arapela Hailans provins.

Dispela 2016 Goroka So bai kamap bikpela moa na bai pulap wantaim planti amamas bikos kain kain danis, singsing na ol faia woks tu bai kamap.

## DEC bai mekim independen asesmen bilong nupela main projek

DIPATMEN ov Enviromen na Konsevesen (DEC) bai mekim wanpela independen asesmen bilong olsem wanem nupela Frieda River kopa maining projek bai bagarapim bus, graun na wara, Minista John Pundari i tok.

Mista Pundari i autim dispela toktok long Palamen long Tunde dispela wik taim Memba bilong Telefomin, Solan Mirisim, i askim sapos DEC i salim ol wok manmeri i go pinis long Frieda River long mekim enviromen asesmen ripot.

Mista Mirisim i tok projek developa, PanAust, i muv i go insait pinis long Telefomin, Wes Sepik Provins long statim enviromen stadi tasol em i no lukim o harim olsem ol wok manmeri bilong gavman i kam insait tu long mekim stadi.

Mista Pundari i tok gavman balensim tupela sait wantaim long larim dispela kopa

maining projek i go het yet.

“Mipela i lukluk long tupela sait wantaim. Mipela i laikim main projek long go het, na tu mipela i les long dispela main projek i bagarapim bus, graun na wara,” Mista Pundari i tok.

Em i tok olgeta gavman ejensi i wok bung wantaim long larim ol i mekim gutpela wok long sevim bus, graun na wara long hap, na tu long larim dispela wol klas kopa main i kamap na sapatim ikonomi bilong dispela kantri.

Mista Pundari i tok ol i mekim pinis ripot bilong enviromen tasol PanAust i no givim yet Enviromen Impek Stadi (EIS).

Taim projek developa i givim ripot bilong EIS, DEC bai go insait na mekim independen asesmen long sekim sapos dispela ripot bilong projek developa em i stap stret i no gat.

## Provinsal Gavman laikim 20 pesen sea bilong oil pam plantesen

MEMBA bilong Ijivitari, David Arore, i tok Oro Provinsal Gavman i laikim 20 pesen ikwiti sea bilong Higaturu Oil Palm long Oro Provins.

Mista Arore i tok taim Sir William Skate i bin stap Praim Minista long 1997, em i bin kamapim wanpela NEC (Nesanel Eksekutiv Kaunsil) Sabmisen long givim bek 20 pesen ikwiti sea bilong Higaturu Oil Palm Plantesen i go bek gen long ol papagraun na Oro Provinsal Gavman.

“20 yia i go pinis na mipela ol pipel bilong Oro na ol papagraun bilong dispela bikpela oil pam plantesen long provins i wet yet long kisim dispela 20 pesen ikwiti bilong mipela,” Mista Arore i tok.

Em i askim sapos Minista bilong Pablik Entaprais na Stet Invesmen, William Duma, i save long dispela o no gat.

Mista Duma i tok em i no bin harim dispela stori tasol em bai sekim ol NEC pepa na lukim sapos dispela em i tru o no gat.

“Sapos em i tru, mi bai helpim ol pipel bilong yumi long Oro. Wai bai mi letim daun ol pipel bilong yumi.

“Em i samting pastaim gavman i bin tok promis long givim bek long ol pipel na provinsal gavman, olsem na bai no bihainim dispela plen bilong pastaim gavman,” Mista Duma i tok.

Gavana bilong Milen Be, Titus Philemon, i askim wankain kwesten i go long Mista Duma long sait bilong Milen Be Estet.

“Gavman i bin tok long givim bek sampela sea bilong bikpela oil pam plantesen long Milen Be. Mi laik askim sapos Minista Duma i ken sekim long Milen Be Estet tu wantaim,” Mista Philemon i tok.

## NASFUND memba i gat planti sans



Stella Manu i baim ol samting long diskaun prais taim em i soim NCSL ID kad bilong em.

OL memba bilong NASFUND Contributors Savings & Loan Society Limited (NCSL) i gat planti sans long baim ol samting taim ol i laik mekim soping.

Wantaim moa long 30 sevis provaida na stua husat i kamap patna bilong NCSL Membasip Loyalti Program (MLP), ol memba bilong NCSL bai inap long baim ol samting long diskaun prais taim ol i soim membasip i D kad bilong ol long wanpela bilong dispela 30 sevis provaida.

NCSL i gat bikpela membasip bikos moa long 81, 000

manmeri i kamap memba pinis. Dispela em i bikpela namba stret taim yu skelim dispela namba wantaim namba bilong ol memba bilong arapela seving na lon sosaiti insait long kantri.

Dispela sevis bilong givim diskaun prais o MLP em i stap long olgeta hap bilong kantri we ol memba bilong NCSL i ken baim ol samting long diskaun prais long wan wan stua na kampani we NCSL i wanbel long kamapim dispela program.

Ol memba bilong NCSL i mas kisim MCSL membasip kad long yusim long baim ol

samting long diskaun prais.

Maketing Menesa na Klaiant Rilesens Tim Lida, Evelove Farapo, i tok dispela patnasip bilong NCSL wantaim ol sevis provaida i laik helpim ol memba bilong NCSL long mekim laip i kamap i si, na tu long kamapim bisnis patnasip wantaim ol dispela sevis provaida.

Aninit long MLP, ol memba bilong NCSL i ken kisim dinau mani o rausim mani ol i sevim long NCSL akaun bilong ol long baim balus tiket, haus, marasin, ol samting bilong mekim haus, na arapela moa sevis.



## Turupav papagraun no laikim maining developmen

OL LOKAL pipel insait long Turupav eria long Almami lokal level gavman eria long Bogia distrik long Madang provins i tokaut strong tru olsem ol i no laikim maining developmen long kamap long bus bilong ol.

Ol i tokaut tu olsem ol i no laikim wanpela kain developmen we i ken bagarapim bus, graun, wara na solwara i kamap long ples bilong ol.

Wanpela lokal lida na mausman bilong ol lain long Turupav, Alex Korom i tokim ol nius lain long Madang olsem wanpela lain i wok long go insait long eria bilong ol na i wok long toktok wantaim sampela manmeri long ples bilong ol long sait long maining developmen.

Tasol, Mista Korom i tok olsem dispela ol toktok long developmen i no go stret wantaim ol lokal pipel, husat i no laikim developmen i kamap long bus bilong ol. Ol i laikim tasol konvesesin i kamap long eria bilong ol.

Mista Korom i tok olsem ol lokal pipel i no save long kampani husat i wok long salim ol lain bilong en i go toktok wantaim ol pipel long Turupav long projek nabaut.

Korom i tok lukaut tu long ol lain bilong dispela kampani long no ken go gen long Turupav eria.

Turupav em i wanpela konvesesin eria insait long Almami LLG long Bogia distrik we eria em ol gavman i putim pinis long gaset.

Almami LLG i kamap wantaim disain bilong en yet wantaim lo long lukautim bus, graun, wara na solwara long lukautim ol ples na graun antap long graun na long solwara. Dispela ol lo i banisim lokal envairomen bilong ol na i stopim loging o wok bilong katim daun diwai, wok maining developmen long solwara.

Almami LLG long Bogia i save wok klostu wantaim non-gavman ogenaesisin we i save wok strong long lukautim bus, graun na solwara nem bilong em The Nature Conservancy. Ol i wok wantaim dispela NGO long was gut na lukautim gut bus, graun, wara na solwara bilong ol.

## Mani mak bilong Tuna ekspot winim K1 bilien pinis

MANI PNG i save kisim long Tuna ekspot i winim pinis moa long K1 bilien mani mak, wanpela wokman bilong National Fisheries Authority (NFA) i tok.

Menesa bilong Kets Dokiumentesen na Setifikesen Yunit bilong NFA, Alois Kinol, i tok mani mak we tuna i save bringim i kam long ikononomi bilong PNG na Gros Domestik Prodak (GDP) i abrusim pinis K1 bilien mak.

"Dispela i soim olsem tuna em i wanpela bikpela risos yumi gat long solwara bilong yumi," Mista Kinol i tok.

Mista Kinol i tok bikpela maket bilong tuna bilong PNG na Pasifik i stap long Yuropien Yunion (EU) maket na patnasip bilong EU na Pasifik em i gutpela long larim yumi salim moa tuna na kisim moa mani.

Wanpela samting we EU i save strong long lukim em i helt stendet bilong tuna. Mista Kinol i tok EU i save strong tumas long tuna i mas bihainim helt stendet bilong em long larim ol pis i no gat baio sekyuriti risk long laip bilong manmeri.

"Ol i save lukim planti

samting olsem sip bilong hukim pis, faktori na plent bilong stretim pis. Dispela em i wok bilong Kompeten Atoriti (CA)," Mista Kinol i tok.

Wok bilong CA i save sekim gut ol sip, ol wok manmeri, ol faktori na plent, na arapela ol samting long tuna indastri long lukim sapos ol i bihainim helt na sekyuriti stendet bilong EU maket.

Long PNG, moa long 40 kampani i bungim dispela CA stendet na o i save salim tuna i go long EU maket.

## Bialla i tok welkam long NASFUND na NCSL



Nupela brens bilong NASFUND na NCSL long Bialla, Wes Nu Briten Provins.

NASFUND Contributors Savings & Loan Society Limited (NCSL) i skruim ol brens sevis bilong em i go moa yet long Bialla long Wes Nu Briten Provins (WNBSP).

Jeneral Menesa bilong NCSL Vari Lahui i tok, "NASFUND na NCSL i laik kisim ol sevis i go klostu long ol memba na givim moa sans long ol long sevim mani bikos NCSL i no save sasim ekstra mani olsem ol arapela fainensal institusen i save sasim. Em i tok NCSL i gat gutpela histori long givim gutpela ritens long ol memba."

Kimbe brens opisa Gima Wimpa i tok ol memba bilong NCSL long hap i amamas long lukim dispela nupela brens long Bialla na em i bilip olsem planti ol kastoma na memba bai kisim gutpela sevis long haus dua stret.

"Planti memba bilong Bialla em ol liklik manmeri husat i save givim mani long Eda Supa na NASFUND tasol. Wantaim opening bilong dispela nupela Bialla Brens ol manmeri bai gat sans long sevim mani bilong ol," Mista Wimpa i tok.

Membasip bilong NCSL i wok long gro na ol manmeri husat i save wok long New Britain Palm Oil Limited, Hargy Oil Palm, ol smol holda na praivet sekta memba i wok long kamap planti.

Bialla brens em i namba 17 brens bilong NCSL aninit long NASFUND. Tupela NCSL na NASFUND wantaim i save givim komplimentari fainensal sevis we NASFUND i save lukluk long long tem ritaiamen sevis na NCSL i save stretim ol sot tem nid bilong ol memba.

## Maining Minista rausim Summit Development

MINISTA bilong Maining, Byron Chan i tok em i rausim divelopa bilong Mt Kare gol na silva projek bikos dispela liklik maining kampani bilong Australia i no givim fainensal ripot long gavman.

Summit Development Limited, wanpela liklik maining kampani bilong Australia, husat i bin holim tenement laisens EL 1093 long kirapim Mt Kare gol na silva projek i feil long givim fainensal ripot long gavman na dispela i lukim Mineral Resources Authority (MRA) i rausim em.

"Summit Development nau i stap long mak bilong mekim likwidesen nau. Dispela kampani i no gat mani long kirapim Mt Kare gol na silva projek," Mista Chan i tok.

Em i mekim dispela toktok las

wik taim Memba bilong Porgera-Lagaip, Nixon Mangape, i askim long wanem samting i kamap long Mt Kare projek.

Mista Mangape i askim sapos Summit Development i holim yet eksplorsesen laisens EL 1093 o nupela maining kampani i kisim.

"Mi les long givim bek EL 1093 long Summit bikos ol i no gat mani long kirapim main projek. Ol i no soim fainensal ripot bilong kampani long mi.

"MRA i bin mekim rekomedesen long givim bek dispela tenemen laisens i go bek long long Summit Development yet. Tasol mi les long givim em taim em i no soim olsem wanem em bai kisim mani long kirapim dispela main projek," Mista Chan i tok.



Tuna pis bilong Kadovar Ailan insait long Wewak Ailan LLG, Is Sepik.



# Sikau maunten long Yangoru-Sausia bai gat nupela rot

OL ruel ples long hap bilong Sikau long Yangoru-Sausia nau bai gat gutpela rot long i go i kam bihain long 40 yia olgeta.

Ol pipel bilong Sikau Maunten eria aninit long Is Yangoru Lokal Level Gavman insait long Yangoru-Sausia Distrik bilong Is Sepik Provins, i no bin gat gutpela rot long kisim ol samting bilong salim i go ausait long taun o long bringim ol sevis long ausait i kam insait. Nau bihain long 40 yia olgeta, dispela lain pipel bai lukim wanpela nupela rot long ples bilong ol i go long bungim bikpela Sepik Haiwe.

Ol pipel i bin lukim wanpela brukim graun

seremoni long stat bilong las wik insait long Distrik hetkwata. Taim i no gat rot, ol pipel i bin kisim taim tru bikos ol i no gat ol besik sevis olsem helt na edukesen.

Ol meri na pikinini i save wokabaut i go longwe tru planti kilomita long painim helt na edukesen sevis. Ol pikinini bilong skul i save kirap long bikpela moning tru long wokabaut i go long skul, na long wankain taim ol mama tu i save taitim bun long karim ol gaden kaikai bilong ol i go long ol maket.

Dispela rot em bai karamapim 10-pela kilomita we bai stat long Howi i go long Tianga na em bai kost K1 milien olgeta aninit long Yan-

goru-Sausia Distrik Sevis Impruvmen Program.

Memba bilong Yangoru-Sausia husat i Minista bilong Tred, Komes na Industri, Richard Maru i bin stap long brukim nupela graun bilong rot na em i stori moa long olgeta hevi we ol pipel i bin save karim long bipo i kam inap nau. Tasol em i tok olsem nau dispela hevi em bai pinis taim dispela rot i kamap.

Minista Maru i mekim singaut long ol pipel bilong em long ol i mas no ken askim long kompensesen long ol samting antap long graun we rot bai i kamap long en na ol i mas larim wok long go het.

“Mi laik askim yupela olgeta long wok bung na stap wantaim Konstraksen lain long lukim dispela rot i pinis. Sevis bai kam long ples bilong yu sapos yu sakrifais long samting yu i gat. Yumi bin stap nating, i no gat rot inap 40 yia na yupela i mas luksave long dispela rot infrastraksa em i bikpela samting,” Minista Maru i tok.

Em i tok em i no go long mekim tok politik tasol long lukim senis na developmen kamap. Olsem na Minista Maru i tok moa olsem em bai putim mani long wanpela wara saplai sevis long go long olgeta ples insait long Sikau maunten eria.

**WHITE TUNA FLAKES**  
**DIANA White**

**WHITE TUNA insait K 2.20**

**DIANA Barbecue Flavour**

*Tasty and Flavourful White Tuna for Everyone!*

Manufactured by: **RD Tuna Canners Ltd.**



Minista Maru i katim han bilong wanpela diwai long statim wok bilong rot infrastraksa. Poto: Opis bilong Dipatmen ov Komes na Industri.

## Sepik Ruel Projek klostu bai kirap

WOK konstraksen bilong Sepik projek bilong lukautim ol kakaruk, kisim sit bilong planim na nupela kakao projek bai klostu kirap.

Luksave bilong dispela i bin kamap long taim ol i bin holim wanpela brukim graun seremoni long wik antap insait long Huaripmo viles insait long Yangoru-Sausia Distrik.

Dispela brukim graun seremoni i mekim klia olsem kontraksen taim bilong dispela ruel projek long ol infrastraksa na ol bilding em i stat nau.

Siaman bilong LR Grup ov Kampani, Illan Weiss i bin stap long go pas long Brukim Graun seremoni long dispela taim.

Dispela projek em bai kamap long Spesel In Ekonomik jon insait long ol Sepik Plein o ples daun bilong Yangoru-Sausia Distrik.

Mista Weiss long taim bilong brukim graun, i mekim tok klia olsem ol pipel bai givim bikpela han long wok bilong dispela projek.

“Kamap bilong dispela projek antap long 5,000 hekta bilong Stet len o graun bilong gavman em bilong planim ol mais, soia bin, kon na tapiok we ol bai yusim long kamapim stok fid bilong ol kakaruk we ol bai lukautim insait long dispela fam. Bihain, ol bai salim ol kakaruk i go long ol narapela provins insait long PNG. Wantaim dispela ol i laik stopim ol stok fid we i save kam long ovasis long givim long ol kakaruk,” Mista Weiss i tok.

“Nupela teknoloji bilong kamapim ol bebi kakaruk bai kirap insait long dispela kakaruk fam we ol bai kisim ol bebi kakaruk long en na bai ol i no ken kisim i kam long ol narapela kantri moa. Dispela hap bilong kamapim ol bebi kakaruk bai helpim gut projek na tu long kamapim moa kakaruk bilong in-

dastri long kantri. Dispela em i namba wan kain projek we ol i bringim i kam insait long Yangoru-Sausia na long kantri. Projek bai gat ol kakaruk mit na kiau, broila na ol leia o mama kakaruk bilong putim kiau. Mipela bai daunim prais long ol kastoma insait long Distrik long 30-40 pesen daunbilo moa long ol prais i stap long maket nau,” Mista Weiss i tok.

Em i tok narapela hap bilong projek em long wokim kakao wantaim ol nupela teknoloji.

“Mipela bai wokim hai intensiv kakao prodaksen wantaim irigesen sistem we bai inap long wokim ol kakao long karim moa prut olsem 5-pela o 6-pela taim winim bilong nau. Mipela i laikim traim long kirapim wanpela soklet faktori bikos mipela bai gat planti kakao tumas,” Mista Weiss i tok.

“Namba wan hap bilong dispela projek em long kisim ol groa long groim ol gren, kakao na kirapim ol poltri o kakaruk projek,” em i tok.

Em tok olsem taim fam i kirap pinis, ol asples lain bai i no inap wari moa long maket bikos wanem samting ol i kamapiim em bai ol i salim i go bek long kampani, klostu long ples tasol. Kampani bai salim gen ol sit i go long asples lain na givim ol trening long gutpela wei bilong groim ol gren.

Minista bilong Tred, Komes na Industri na lokal memba bilong Yangoru-Sausia Distrik, Richard Maru i tok tenkyu long ol lapun papa long wanem kain sakrifais ol i bin wokim long givim graun bilong ol i go long developmen bilong olgeta pipel.

“Insait long dispela projek, planti bilong yupela bai lukim planti tausen kina insait long ol wik i kam, i no moa olsem bipo,” Minista Maru i tok.



# Roosters i daunim ol Illawarra

SYDNEY Roosters i daunim ol St George Illawarra, 42-6, long Sydney Futbol Stediam na i stopim driman bilong ol Dragon long go long NRL fainel.

Blake Ferguson i putim tupela trai na Daniel Tupou tu i putim tupela trai bilong ol Roosters long las wik Sande.

Long wankain taim, Mitchell Pearce na Jared Waerea-Hargreaves i bin pilai gut tu na ol asples i skoim namba siks win bilong ol long dispela sisen.

Sapos ol Dragons i win long las tripela gem bilong regula sisen em ol bai winim driman bilong ol long go insait long fainel.

Ol Rooster i soim stail kala bilong ol long stat bilong resis na skoa bilong ol i sanap olsem 12-0 long 27



Ryan Matterson i putim trai bilong ol Sydney Roosters.

minit bilong resis taim.

Long namba 36 minit, pilaia bilong ol Dragons, Gareth Widdop, i putim namba wan na las trai bilong ol.

Tasol, Roosters i go het na strongim banis bilong ol na skruim skoa i go antap long 42-6 long namba tu hap bilong resis.

# Ragbi lig klap, St George, i tokaut long drag tes



Ol pilaia i tok olsem ol i laik lukim olgeta klap long eria i go insait long dispela program.

KWINSLAN ragbi lig klap, St George Illawarra, i tokaut olsem planti pilaia i bin go long drag tes na liklik namba i no go long tes taim ol i tokaut long drag tes polisi long stat bilong dispela yia.

St George Ragbi Lig Klap, i stap long Sauten inlan bilong stet, em i namba wan long salim ol pilaia bilong ol long tes long drag long rijaional Kwinslan.

Gren fainel driman bilong tim i kam mak long las Sande taim ol Roosters i bin daunim ol.

Kosa bilong ol Illawarra, Sam Davis, i tok, ol i bin lus, tasol resis bilong sisen i kamap namba wan tru.

“Mi bin lukim olsem bikpela senis i kamap long ol pilaia,” Davis i tok.

“Ol boi i bin pilai gut we ol i no save pilai olsem bipo na

mipela i gat gutpela sisen.” Foapela pilaia i bin go long drag tes na gat positiv risal, tasol ol i tok orait long ol i ken go het long trening.

St George Ragbi Lig Klap, bai go het long dispela entidrag polisi long yia i kam.

Pilaia bilong ol Illawarra, Chris Bella, i tok moa olsem, taim wanpela tim i go long drag tes i minim olsem olgeta tim mas go long tes tu.



# Olimpik: Brasil i daunim Jemani long penelti na winim futbol gol

SOKA resis i kamap namel long Brasil na Jemani long Rio Olimpik Gems strong tumas, tasol ol asples i daunim ol Jemani long Penelti kik na winim futbol gol.

Dispela em i namba wan taim bilong ol Brasil long winim gol long soka resis long Olimpik gems.

Olgeta 70, 000 asples manmeri i singaut long Vast Maracana Stediam long taim, pilaia bilong ol Brasil, Neymar, i kikim bal i go insait long lep sait bilong golkipa bilong Jemani, Timo Horn, na i go insait long net.

Dispela win egensim kantri husat i save go long ol fainel bilong soka long planti taim em i kamap histori.

Pilai bilong tupela kantri i kamap strong tumas we tu-



Golkipa bilong Brasil, Weverton, i amamas wantaim Neymar long Maracana Stediam.

pela i kisim wan wan poin inap long ol i bungim pinis taim bilong namba tu hap bilong resis.

Ol i bin givim ekstra taim na kepten bilong Jemani i no kikim bal i go insait long net.

Tasol, Neymar i gat bikpela

sans long kikim las penelti kik i go insait long net na winim gol bilong ol Brasil.

Olgeta pilaia na asples manmeri i amamas long ol i winim gol long namba wan taim long soka resis long Olimpik Gems.

# Feyisa Lilesa bilong Ethiopia i winim silva ...i soim protes sain egensim plen bilong gavman

SILVA medal wina bilong Ethiopia, Feyisa Lilesa, i holim han bilong em i go antap long het na saptim ol Oromo traib taim em i soim sain bilong protes egensim plen bilong gavman long rausim ol lain long famlan.

Lilesa i soim protes sain long taim em i pinis namba tu long maraton resis long Olimpik gems.

Ol i bin plen long givim olgeta graun i stap arere long kapitel i go bek long gavman long kirapim siti bilong ol bikos Ethiopia i develop kwik taim insait long 10-pela yia i go.

Ol lain i gat pawa i tokaut long plen long Janueri, tasol ol lain i straik na ol i skruim disisen bilong givim graun i go bek long gavman insait long sampela mun.

Moa long 100 pipel ol i bin kilim i dai. Tasol, gavman i

tok dispela straik em ol i no bin bihain lo na gavman bai no inap luksave long ol lain husat i dai.

“Oromo em i traib bilong mi. Ol lain long Oromo i protes nau long wanem samting em i gutpela long ol, bilong bel isi o pis, na bilong graun,” Lilesa i tok klia bihain long em i winim silva.

Em i tok moa olsem em i pret long lo bai holim em taim em i go bek bikos em i soim sain bilong protes long taim em i resis.

“Mi ting olsem mi mas i go long narapela kantri, bikos yu bai kisim fridom sapos yu saptim gavman long olgeta taim. Yu bai no inap long mekim wanpela samting yu yet,” Lilesa i tok.

“Olgeta sain bilong protes em ol i save was gut tru long Ethiopia.”



Feyisa Lilesa i pret long gavman bai holim em na askim taim em i go bek long Ethiopia bikos long em i soim sain bilong protes long taim bilong resis.

# Taim ol i pasim Olimpik Gem long Rio







# Ramu NiCo bringim envairomen awenes long ol skul pikinini

**AWENES o bringim aut tok save i go long komyuniti long toktok na infomesen long envairomen em bikipela samting tru Ramu NiCo Menesmen (MCC) save mekim olgeta taim.**

Long las wik ol Helt, Sefti na Envairomen (HSE) na Komyuniti Afes (CA) opisa bilong Ramu NiCo i bin go aut long tupela elementeri skul long Basamuk eria long bringim awenes bilong Envairomen Pemit na Operesenal Envairomen Menesmen Plen (OEMP) long ol liklik skul pikinini long tupela elementeri skul long Basamuk eria.

Dispela tupela skul em Mindere na Tugyak Elementeri.

Aninit long lo bilong gavman em Konsevesen na Envairomen Proteksen Atoriti (CEPA) i lukautimn Ramu NiCo i mas bihainim ol lo bilong PNG long lukautim gut bus, graun, wara na solwara long eria em i wok long en. Ramu NiCo (MCC) i save bihainim ol wok plen aninit long OEMP long sekim na banisim ol birua na bagarap long kamap long envairomen aninit long 20-pela sab-plen long was gut long wok bilong en.

Ramu NiCo Basamuk sait HSE Suprintenden, Moses Ya'a i tok klia olsem tupela elementeri skul ya em wanpela long stap long han-sut na narapela long han-kais long BSK Rifaineri operesen.

Mista Ya'a i tok ol i makim ol dispela tupela skul long wokim namba tri kwata envairomen awenes long senisim stail long bringim infomesin nau i go long ol pikinini bikos pastaim awenes i save go long ol bikipela, manmeri.

"Ol liklik pikinini i mas save taim ol i liklik yet na gro yet na stap long skul wanem gutpela skul na save long sait long envairomen o pasin long lukautim bus, graun, wara na solwara bilong yumi," Mista Ya'a i tok.

Long las wik Trinde tu i lukim Basamuk Rifaineri Jeneral Menesa, Bill Hill i go wantaim ol HSE opisa long givim toktok long ol elementeri skul sumatin na dispela i mekim ol dispela liklik pikinini i amamas stret.

Mista Hill tu i amamas long gutpela pasin na welkam ol elementeri skul sumatin i soim long Ramu NiCo tim.

Mista Ya'a tok olsem planti kain kain toktok na tingting ol manmeri i save mekim long ples long wanem ol wok i kamap insait long Basamuk Rifaineri bilong Ramu NiCo long sait long envairomen. Olsem na taim ol Ramu NiCo opisa i go aut long ol ples klostu na givim toktok em bai stretim tingting bilong ol pipel long komyuniti long save gut long wanem wok Ramu NiCo i wokim long Basamuk Rifaineri.

Mista Ya'a i tokaut tu olsem i gat ol wokman meri bilong ol viles klostu i wok long Kampani. Na bihain ol skul pikinini bai i gat sans long wok wantaim Ramu NiCo Projek. Olsem na dispela em gutpela sans long bringim pasin bilong wanbel na wok-bung long serim infomesen i go kam long sapotim projek long go het gut.

Dispela komyuniti envairomen awenes i sut long givim tingting na skul ol liklik pikinini long elementeri skul long save long ol gutpela pasin long lukautim bus,

graun, wara na solwara bilong yumi.


Ramu NiCo envairomen opisa Kaupa Kia i givim ol elementeri skul sumatin ol liklik tes na askim kwesten i go long ol sumatin long sait

long gutpela bilong envairomen na ol sumatin i amamas long bekim. Narapela HSE opisa Sailas i givim toktok tu long pasin bilong lukautim bodi, na waswas oltaim wantaim sop na stap


klin oltaim. Dispela bai helpim long banisim sik na tu mekim ol sumatin i stap helti na strong na ol i ken lainim moa samting long skul.

Mista Ya'a i tok olsem ol sumatin na ol tisa long tu-


pela skul long Tugyak na Mindere i amamas tru long go bilong ol Ramu NiCo HSE tim. Planti ol sumatin i askim kwesten long sait long sefti na envairomen na ol opisa i bekim.



Basamuk Rifaineri Jeneral Menesa Bill Hilli givim toktok long Tugyak elementeri skul long Raikos.



Grup poto wantaim ol skul sumatin long Tugyak.





# Digicel i helpim Paralimpik pilaia long go long Rio

**DIGICEL em i strongpela sapota bilong spot long PNG na i givim K40,000 kes mani long helpim PNG Paralimpik tim, kosa bilong ol na sapotim ol woklain taim ol i bin wokabout moa long 16,000 kilomita long Pot Mosbi na i go long Rio de Janeiro, Brasil.**

Menesing Dairekta Mobail bilong Digicel, Shivan Bhargava, i tok Papua Niugini i stap baksait long tim.

"Dispela em sans long makim kantri bilong yupela long spot na Digicel i gat bikpela amamas long helpim tim long liklik wei long strongim ol etlit bilong yumi long winim driman bilong ol," Bhargava i tok.

"PNG i amamas long hatwok we ol memba bilong paralimpik tim bilong yumi i soim olsem ol i redi long go resis long gem na mipela i kamap wan baksait long tim olsem mipela i givim gut-

pela lak long ol i go resis long Rio."

Bhargava i tok, "Mipela i helpim ol long baim transpot bilong ol go resis em i bikpela samting tru.

"Mipela i bilip olsem mani bilong Digicel i helpim ol long rausim wari bilong ol etlit na larim ol long ol i lukluk long spot na amamasim ol yet long ol nupela samting ol i luksave."

Sef de Misin, Doka Kefu Ma, i tok tenkyu long Digicel i stap baksait na helpim paralimpik tim wanpela moa taim.

"Digicel em i bikpela sapota bilong PNG Paralimpik tim inap long Beijing 2008 Paralimpik Gems. Mipela i gat bikpela amamas long Digicel i save helpim ol etlit bilong mipela long olgeta taim," Ma i tok.

Paralimpik Tim bilong PNG long 2016 em, ai pas etlit, Joyleen Jeffrey, bai

resis long 100 mita na 200 mita T12 na Samuel Nason bai resis long long 400 mita T47. Tupela kosa, Peter Aglua na Samu Sasama, em tupela woklain bilong PNG Spot Faundesen na Nesenel Spot Institut na tupela bai go wantaim ol etlit long Rio.

Rio 2016 Paralimpik Gems bai kamap long mun Septemba 7 i go inap long Septemba 18 na moa long 4400 etlit bai resis aninit long 170 kantri.

Papua Niugini i bin resis pinis long planti Paralimpik Gems stat long 1984 inap long 2012 long London.

Namba wan Paralimpik medal bilong kantri em Francis Kompaon i bin winim. Em i bin winim silva long 100 mita sprint fainel resis bilong ol man long Beijing, we em i bin winim mak wantaim 0.05 seken bihain long gol medal wina bilong Australia.



Digicel i bin givim K40,000 kes mani long ol 6-pela Paralimpik etlit husat bai go long 2016 Paralimpik Gems long Rio long mun i kam.

## Tigers i stap sambai long pilai gren fainel ...Eagle na Guria bai pilai semi fainel

FOAPELA tim i bin pait long bikpela dabol heda eliminesen fainel resis bilong Digicel Kap i bin kamap long Sir John Guise stediam long Pot Mosbi long las wik Sande.

Maina premia bilong Digicel Kap resis, ol Snax Lae Tiger, i bin pilai egen-sim ol Wamp Nga Hagen Eagle long 2 klok apinun na namba tu gem i bin kamap namel long Provinsal Gavman Enga Miok na Agmark Rabaul Guria i bin stat long 4 klok apinun.

Oi Tiger i bin daunim ol Eagle long namba wan gem bilong namba tu Digicel Kap eliminesen fainel resis.

Oi Tiger i bin stap pas long taim bilong malolo wantaim 18-12. Tasol, ol Eagle i bin putim wanpela trai long stat bilong namba tu hap bilong resis we konvesen kik bilong ol i no bin go insait.

Oi Tiger i bin kikim wan-

pela strongpela kik bihain long trai bilong ol Eagle na pul-bek bilong ol Eagle i dropim bal we wanpela pilaia bilong ol Tiger i hariap tru i go insait na pikim bal na putim trai. Dispela i skruim skoa bilong ol i go antap long 24-16 bihain long kik bilong ol i go insait.

Oi Eagle i strong na putim wanpela trai klostu long pinis bilong namba tu hap bilong resis, tasol ol Tiger i daunim ol wantaim tupela poin, 24-22. Oi Tigers i stap sambai na wet long gren fainel de.

Oi Rabaul Agmark Guria i bin daunim ol Miok long namba tu resis bilong ol top foa tim bilong Digicel Kap.

Stanley Olo bilong ol Guria i bin putim tupela trai long namba wan hap bilong resis we skoa i sanap olsem 12-0 inap long ol i bungim taim bilong malolo.

Long 15 minit bilong

namba tu hap bilong ol resis, hap-bek bilong Miok, Dicksy Anni, i bin klap i go antap na kesim bal long trai lain bilong ol Guria taim wanpela poro pilaia bilong em i kik, na i putim namba wan na las trai bilong ol Miok.

Tasol, Joe Taputapu bilong ol Guria i bin putim wanpela moa trai na i skruim skoa bilong ol, 16-6.

Oi Guria i no givim wanpela sans long ol boi Enga na pilaia bilong ol, Ezra Gotuno, i brukim banis bilong ol Enga na putim trai i bringim skoa go antap moa long 22-6.

Nau ol Guria bai pilai egen-sim ol Mt Hagen Eagle na wina bai salensim ol Tiger long gren fainel bilong Digicel Kap.

Tupela gem wantaim i bin kamap long Sir John Guise Stediam i bringim planti sapota bilong futbol na planti lain i amamas long las wiken.

## Tim ENB i bung na stap pas long PNG Gems



Tim Is Nu Briten (ENB) i traime pilai long taim ol i bin bung long las Sarere

TIM Is Nu Briten (ENB) i soim olsem ol i bung na mekim wok redi long ol PNG Gems bai kamap long Kimbe, Wes Nu Briten Provins.

Tim i bringim olgeta spot man na meri bilong em i kam insait long Provins na i holim bung de bilong ol long las wik Sarere.

"Mipela i wanpela bikpela famili husat bai makim dispela Provins," Deputi Tim Menesa, Alois ToBata i tok.

Bung i kamap long Sarere em i wanpela sans taim bilong menesmen opisal bilong Tim ENB long givim sampela skul toktok na tu ol i tokaut long ol wanem kain mak ol spot man-

meri i ken winim long nem bilong Provins.

Oi i lukluk long strongim tim na redi long 2016 PNG Gems long Novemba. Oi i redi long soim gutpela kala bilong ol long dispela yia.

"Mi i tim long winim ol narapela. I no gat wanpela astingting i stap long wanem mipela bai lus long ol gem. I no gat wanpela asua i stap, nogat," ToBata i tok.

ENB bai salim 600 etlit long resis long ol 17 spot. Oi bai salim dispela tim i go long Kimbe bai sasim ol K2.5 milien na K1.9 milien bilong dispela mani em provinsal gavman bai helpim.

## Oi Guria na Eagle bai pait long semi fainel

BIHAIN long namba tu preliminari resis bilong Digicel Kap dabol heda i kamap long Sir John Stediam long las wik Sande, ol Rabaul Guria nau bai salensim ol Mt. Hagen Eagle.

Oi Eagle i gat wan moa sans long resis long go insait long gren fainel salens bihain long ol i lus long ol maina premia Snax Lae Tigers, husat i stap sambai long gren fainel salens.

Nau ol Eagle bai salensim ol Guria, husat ol i wina bilong namba tri na foa resis we ol i bin daunim ol Enga Miok.

Kosa bilong Gurias, Steven Nightingale, i tok olsem ol i win long las Sande resis egen-sim ol Miok, tasol ol i gat planti wok long mekim bipo long salensim ol strongpela Eagle long dispela wiken.

"Mipela i bin mekim planti



Oi Mioks i daunim ol Gurias long raun 12 long asples bilong ol Mioks long Wabag, Enga.

asua long ranim bal long pilai graun na i stap opsait we dispela em ol liklik samting i save bagarapim gem bilong mipela," Nightingale i tok.

Em i tok moa olsem, tim bai nau lukluk long ranim

bal gut na lainim ol lukluk skul toktok long ragbi bilong bungim ol Mt.Hagen Eagle.

Nau, ol Tiger i wet long wina bilong Guria na Eagle bai resis long bungim ol long gren fainel bilong Digicel Kap salens.



Wanpela fowod bilong ol Mt. Hagen Eagle i traime long brukim banis bilong ol Snax Tigers, tasol planti pilaia bilong ol Tiger i go insait na strongim banis bilong ol.



# Guria na Eagle Gem bai kamap long Sarere

PRELIMINERI fainel namel long ol Agmark Rabaul Guria na Wamp NGA Mt. Hagen Eagle em ol bai pilai long dispela wik Sarere long Sir John Guise Stediam, Pot Mosbi. Papua Niugini Nesanel Ragbi Lig (PNGNRL) i strongim dispela toktok bihain long ol bod i bung na toktok long taim, de na hap bilong pilai bi-

long preliminari fainel bilong 2016 Digicel Kap salens. Ol bai statim gem long 3 klok apinun na ol bai salim ol tiket long olgeta Stop N Shop stua long Pot Mosbi. Wina bilong ol Guria na Eagle bai salensim ol Snax Lae Tiger long gren fainel resis bilong 2016 Digicel Kap long neks wik Sarere.

## Vanuatu spot edministreta, Joe Carlo, i dai ...ol Pasifik Spot lida bai tok gut bai long Carlo

PASIFIK Gems Kaunsil (PGC) i tok, ol bai toktok long wanem kain gutpela wei ol bai tok gut bai long Vanuatu Spot Edministreta, Joe Carlo, husat i dai long wiken. Carlo i bin go pas long bid tim na winim rait bilong hostim 2017 Mini Gems, bai kamap long Pot Vila. Em i bin stap CEO bilong Gems Ogenaising Komiti klostu taim na lusim dispela wok bikos em i gat sampela hevi long helt bilong em. Presiden bilong Pasifik Gems Kaunsil, Vidhya Lakhan, i tok, Carlo i bin sik, tasol em i gat moa pawa long spot. "Em i bin mekim planti preliminari wok wantaim gavman na tru, em i no wanpela isi wok bikos gavman bilong Vanuatu i senis

klostu klostu insait long tupela yia i go. Em i stap strong long kisim toktok i go long Vanuatu gavman, long ol taim gavman i senis," Lakhan i tok. Na tu, Carlo i bin stap Presiden bilong Vanuatu Olimpik Komiti klostu long 20 yia na givim taim tu long ol eksekutiv bilong Osenia Nesanel Olimpik Komiti, Vanuatu Ragbi na olsem delegesen i go long Pasifik Gems Kaunsil. Lakhan i tok, em bai plen long toktok wantaim ol lida bilong VASANCO, taim ol i pinis long Rio Olimpik resis na kam bek long kantri. "Ol pipela bilong Vanuatu na Pasifik komyuniti husat i save long lekmak bilong Joe Carlo bai sori tru long Joe," Lakhan i tok.

# Tim NCD redi long Kimbe

Nicky Bernard i raitim

TRIPLEA mun bipo long PNG Gems bai kamap na ol Tim NCD i redi pinis long kisim bek taitel ol bin lusim long Morobe long tupela yia i go pinis.

Long Tunde nait Tim NCD i tokaut long bikpela sponsa bilong ol i kam long Southern Cross Assurance Ltd wantaim long mani mak long K100,000.

Dispela K100,000 Southern Cross Assurance bai brukim go long tupela hap, K60,000 em bai Tim NCD yusim long kisim ol go long Kimbe na K40,000 em bilong helpim pilai manmeri bilong tim NCD sapos ol kisim bagarap long taim bilong pilai dispela mani bai helpim ol.

Southern Cross Assurance i bin sposa long tim NCD long taim PNG Gems kamap long Lae na dispela yia bai namba tu taim bilong ol long

helpim tim NCD. Dispela helpim bilong SCA wantaim K100,000 i givim ol neming rait long ol long tim

NCD taim ol go pilai long Wes Nu Briten Provins long Novemba. Tim NCD bai kisim bikpela

ol pilai manmeri long go long Kimbe long kisim bek taitel bilong ol taim ol lusim long tim Morobe long 2014.



Ol bik manmeri bilong tim NCD i sanap wantaim CEO bilong Southern Cross Assurance Lohia Boe Samuel na Technical Director Jeremy Camps taim ol tokaut long sponsa bilong ol. Tim NCD bai salim klostu long 700 pilai manmeri long go long Kimbe long Novemba. Lukim moa stori long pes 26. Poto Nicky Bernard.

## Baru i bin kam bek long las Fraide

NUPELA weitlifita bilong Papua Niugini, Morea Baru, husat i bin go resis long 2016 Rio Olimpik resis i bin kam bek long ples bilong em, Pot Mosbi, long las wik Fraide apinun.

Ol famili, pren na poro weitlifita bilong em wantaim namba foa taim

Olimpik etlit, Dika Toua, i bin go bungim em long Jacksons ples balus em taim em i kam daun long balus.

Morea em i namba etlit bilong Tim PNG husat i kam bek long kantri pas. Ol narapela tim i bin kam bek long dispela wik.

Morea i tok, em bai stap bek long ples na malolo na bihain bai em i go bek long Osenia Weitlifiting Institut long Noumea, Nu Kaledonia, bilong mekim wok redi long resis long Komonwelt Gems.



Morea Baru i holimpas wantaim famili na pren bilong em taim em i kam pundaun long Jacksons ples balus, Pot Mosbi.



Planti famili na pren bilong Baru i go tok welkam long em long ples balus.

## Samantha em i las etlit i resis long Rio

SAMANTHA Kassman em i las etlit bilong Tim PNG long resis long Taekwondo resis bilong ol meri long Rio 2016 Olimpik Gems.

Samantha i bin pait long Sande moning long +67 kilogram divisen egensim etlit bilong Briten, Bianca Walkden, husat ol i renkim em namba tri long ol Olimpik resis.

Walkden em i wol sempion bilong 2015 Taekwondo resis, tasol Samantha i makim kantri, PNG, na i resis egensim em.

Em i bin pait strong egensim top birua husat i gat planti ekspiriens long dispela level bilong pait.

Ol Australian tim memba i sapot strong long Samantha bikos ol i save long ol yet taim ol i resis long tonamen long Australia long stat bilong trening i go inap long Olimpik resis i kamap.

Ol Brasil tu i amamas long stail bilong Samantha long pait na ol i sapot tu long Tim PNG long stat bilong pait i go inap long pinis bilong pait.

Samantha i tromoi wanpela kik i go long, Walkden, bilong Briten.







Pilaia bilong ol Tigers i soim strong bilong em long pilai bilong ol Eagle long semi fainel pilai bilong Digicel Kap. Ol tiger i win na go pas long wetim gren fainel.



Bikpela fowod bilong ol Guria i traim banis bilong ol Miok. Gurias bai bungim ol Hagen Eagle long namba tu semi fainel. Wina bilong tupela bai go bungim ol Lae Tiger long gren fainel.

Tupela pilaia bilong ol Enga Miok i stopim pilaia bilong Rabaul Guria long nokaut pilai bilong Digicel Kap long Mosbi. Ol Guria i win.



Pilaia bilong ol Mt Hagen Eagle i ranawe long pilaia bilong Lae Tigers long Digicel Kap pilai bilong long Mosbi. Ol tiger i win.



# Ol piksa bilong Samantha na Max Kassman i resis long Taekwondo long 2016 Rio Olimpik Gems.

Samantha em i las etlit bilong Tim PNG long resis egensim 2015 Taekwondo Wol Sempion bilong Gret Briten, Bianca Walkden.



Max Kassman i redi long pait na i wokabaut i go insait long hap bilong pait. Kosa bilong em i kam long baksait bilong em.



Birua bilong Max i tromoi wanpela kik long pes bilong em.



Max i bekim kik bilong birua bilong em (piksa 3), tasol birua i blokim wantaim han.



Samantha i redi long go insait na pait.



Max na Kosa bilong em i bin holimpas bipo long Max i go insait na pait.




Max i kikim birua bilong em na em i laik pundaun.



Birua bilong Samantha bilong Briten i tromoi wanpela kik long sait bilong em.





WHITE TUNA FLAKES  
**DIANA White**



Manufactured by:  
RD Tuna Cannery Ltd.

WHITE TUNA  
insait  
**K 2.20**



*Tasty and Flavourful White Tuna for Everyone!*

# NCRRLC bai kamap long wik i kam

SIAMAN bilong Papua Niugini Ragbi Futbal Lig (PNGRFL), Sandis Tsaka, i tok olsem Nesenel Konfederet Ragbi Lig Sempionsip (NCRRLC) bai kamap long wik i kam.

Dispela nesanel sempionsip bai sat long Trinde, Ogas 31 i go inap long Sarere, Septemba 3, 2016 long Lae Ragbi Lig graun long Sir Ignatius Kilage Stediam.

Foapela konfederet em Sauten, Hailans, Ailan na Noten na bai gat tim aninit long skul anda 16, anda 18, senia na meri tim.

“Dispela Nesanel Sempionsip bai op long Trinde na long wankain taim ol bai statim sempionsip wantaim resis bilong skul boi anda 16 na anda 18 bai stat long 9 klok moning,” Tsaka i tok.

Em i tok, resis bilong ol meri na anda 20 bai kamap long Fonde, Septemba 1.

“Resis bilong ol senia man bai stat long Fraide na i go inap long Sarere. Resis bilong ol man bai pinis long Sarere wantaim ol fainel na Nesanel Sempionsip bai pas

bihain long ol i makim wan wan tim long olgeta divisen.

Ol tim husat ol bai makim em ol bai pilai long Praim Minista's XIII wiken taim Australia PM XIII bai pilai egensim ol PNG PM XIII long 24 Septemba, 2016, long Pot Mosbi.

Tsaka i tok save long olgeta konfederet long makim ol pilai na opisal long ol lig na asosiesen husat i afiliet wantaim PNGRFL tasol.

“Nesanel sempionsip i save bungim ol yangpela jeneresen na lukluk long ol yangpela namba wan ragbi lig pilai bilong PNG i gat gupela skil na disiplin, na makim wan wan konfederet na lig long olgeta hap long PNG,” Tsaka i tok.

Nesanel Sempionsip i gat bikpela histori long painimaut ol nambawan pilai olsem ol i bin makim Kato Otio, Brandy Peter, Gahuna Silas, Ismael Balkava, Philemon Kimisive, Warren Glare, Nickson Borana, Edward Goma, na planti moa husat i go het na pilai long Digicel Kap na Hunters.

“PNGRFL i laikim olgeta opisal na pilai husat ol i bin makim pinis long soim gut-

pela pasin long taim bilong sempionsip resis long Lae, Morobe,” Tsaka i tok.

Geit fi bilong ol bikpela man na meri em K2 long olgeta hap bilong pilai na ol

pikinini i gat krismas mak long 12 na kam daun bai go insait nating.

## Tim NCD redi long Kimbe

lukim stori long pes 26...



TENKYU TUMAS: Deputi Siti Menesa komyuniti na sosel sevis, Honk Kiap (lephan), i kisim sek mani long han bilong CEO bilong Southern Cross Assurance Lohia Boe Samuel. Poto Nicky Bernard.

## Mitsubishi FUSO Rosa Bus

Apcred ensin  
130Hp  
4 silinda disel



**Ikamap Wantaim  
26 na 30 Sit**

Hariap nau na go long  
Boroko Motors dila bilong yu



Port Moresby ph: 325 5255 | Lae ph: 472 1144 | Mt Hagen ph: 542 1933 | Tabubil PH: 649 9048  
Kimbe PH: 983 5035 | Madang PH: 422 2659 | Kokopo PH: 982 8193 | Goroka PH: 532 3552

Email: info@borokomotors.com.pg  
Website: www.borokomotors.com.pg

